

光緒江西通志

江西通志卷一百五十四

列傳二十一

撫州府四

國朝

晁道焜字懷劬祖公詩建九經堂於金谿卽今學宮也
道焜少孤事母盡孝分產自取硯瘠曰吾年長尙習經
營惟諸弟可憫耳順治丁亥大饑百計賑施周人緩急

雖老不懈年八十餘卒子星舉人有素心堂北山悟言

集

安志謝志舊案安志孝義傳有同邑傳振鉉樂安
丁自昌謹案臨川縣志道焜宋賢百談之裔百談

自宜春徙臨川遂爲臨
川人以掾官永福尉

江琳字嘉玉金谿人諸生順治五年金聲桓叛瀝寇乘
機構亂假冒援師所至焚掠琳母朱被執琳傾貲求活
母繼以簪珥力竭未厭遂殺琳琳女七歲見父死以石

擊賊中額賊怒復殺女朱强起奪刃不勝併殺之安志

楊孕第字及君樂安人順治拔貢歷官鳳翔知府甲寅

吳三桂叛鳳翔為川咽喉進剿兵糧餉轉輸賴以不匱

升神木道副使以母老告終養歸卒於家安志

張朝國金谿人順治四年知松溪縣時兵燹後民多散

處井邑一空朝國招集流亡結以恩信咸歸復業嘗自

署其廳事云以名教為樂地登赤子於春臺後郎西兵

起遇害邑人皆為垂涕福建通志 謹案縣志嘉慶六年補廕恩騎尉世襲罔替

李來泰字石臺臨川人順治進士授工部虞衡司主事

出督江南學政已而巡視漕河復整飭蘇常水利農務

裁缺歸里康熙戊午以博學宏詞徵明年授翰林院侍

講卒於京邸所著有蓮龕集四十餘卷并史館諸傳稿

安志

游東昇字曰生臨川人順治進士聞母變兼程歸以未視含殮爲恨哀毀委頓遂不起人咸惜之東昇性介特復好赴人緩急里人陷冤獄將鬻妻以賂吏立爲白其事所著有緣映樓集從子恢博通經史著深柳堂詩三

十卷

府志
縣志

張應勝字鴻冥臨川人順治進士康熙九年任廣西北流知縣十三年十月孫延齡據廣西叛應勝調集鄉勇爲備僞將唐朝鳳以兵來攻應勝率眾登陴拒守三日夜勢危不支守備常某開西門出降應勝出南門督戰力孤不敵爲賊所害家丁五人吏何涵俱死之雍正三年遣官

論祭

府志得五世孫

謹案縣志載乾隆六十年奉

旨飭查後裔

永成賞給恩騎尉准作文生員一體鄉試仍給

敕書世襲應勝入祀忠義祠

原良本姓元字鳴善樂安人篤志聖賢之學年八十餘猶孜孜講習或諷以過勞良曰人如魚書如水水所以

養魚魚不勞於水書所以養心心不勞於書也所著有

三山存業十編步薦草二十四卷桑綢彙紀三卷詩集

六卷

安志湯秀琦字小岑顯祖從孫順治副貢鄱陽教諭秀琦生

有異稟鳳目龜息總角博通載籍詩賦典麗有祖風晚

年邃於經學易詩春秋各有注解

府志余為霖字蘊隆金谿人順治鄉舉康熙中授山東齊東知縣齊東地高水少亢旱已七載戶口日寡為霖至招

集流亡給牛種勸開墾令民掘井種桑勤事者賞又請於大吏給復漕運夫價免河工柳木徵輸民氣漸復東省州縣舊有捕緝八旗逃人之責民困株連爲霖憫之凡獲逃人鞠實卽遣毋延蔓所至有仁聲李之芳嘗爲文美之丁憂歸起補四川閬中縣爲霖少與大治余某爲兄弟交余貴顯有貪饕名爲霖懼其援己也力以母老乞養後余敗人尤多其識

府志

鄭秀字信從臨川人順治進士累官四川福建道監察

御史承

詔鞠尙書某獄左都御史明珠姻也先日明珠屬秀寬之獄具卒論如法遷給事中出爲衡永道副使筦鹽法商人以八千金饋峻卻之復饋酒十二甕爲壽發之金也明日

召諸商還之曰吾不飲酒汝輩慎之自是三州鹽無重

價

府志

梁奇字大奇東鄉人順治進士浙江桐廬知縣邑故衝
供億並出里役奇至裁之嘗刊孝經以教民曰此移風
易俗之本也甲午充同考官得士七人連捷者六蔡啟
傳其一也主試熊伯龍命搜他房遺卷又得史大成他
日與啟傳皆以第一人及第人服其精鑒

府志

蘇汝霖字雲生金谿人順治進士山西潞安推官有惠
政擢浙江金華同知以執法忤上官乞歸康熙十三年
耿精忠據閩土寇充斥縣爲賊據明年四月城復十月
僞將朱統錫破建昌攻金谿城復陷執知縣吉必兆汝
霖痛哭從閒道趨郡求援至蓋山被執脅之降不從囚

之貴溪般若寺十五年十月賊復脅降汝霖大罵賊怒
擊其齒噴血濺賊面遂遇害乾隆二十九年入祀昭忠
祠並祀邑忠義祠嘉慶六年補廕世襲恩騎尉

府志

陳石麟字及陵崇仁人順治進士初授河間獻縣補西
安澄城調鄆縣俱以善政聞行取戶部山西司主事遷
吏部考功郎嘗言貪酷惰荒驕奢縱徇褻客十字爲官
箴玷作十勿戒書之座隅自號勿齋

府志

楊遴字雲將金谿人父迺武明季殉難遴少孤母饒守
節撫之母多病躬扶持者九年病良已兩姊貧乏無依
遴分產割宅居焉踰二十年教兩甥成立乃反之遴好
學通經與南昌杜果臨川黃石麟同邑孔大德爲忘年
交潛心濂洛關閩之旨會

詔舉博學宏詞督撫將以遴應臨川李來泰亦寓書石麟勸之行遴以父殉義且母老堅辭不赴府志

李曰滌字亦白臨川人國禎子明歲貢生少有志操讀書喜博覽通眾流百家之言與里中章世純羅萬藻友爲文幽潔深邃有名於時遭世變避亂宜黃戴溪山中鼎革後屢徵不起卒於家府志

游裕字伯懋臨川人歲貢生家世科第而裕獨覃心古學工古文李紱年十歲能爲詩古文稱奇童裕招之學誘掖獎勸紱以文章經濟大顯於時裕有先導之力焉子儔譜亦有名府志

劉嘉猷金谿人明崇禎舉人授新建學教諭升侯官知縣甲寅耿精忠叛力拒僞命遂被害事

周亮工字元亮金谿人寄籍河南祥符明崇禎進士初

安志謹案縣志康熙三十五年與知府王之儀並祀九忠祠嘉慶元年

補廕恩騎尉世襲

周亮工字元亮金谿人寄籍河南祥符明崇禎進士初任山東濰縣知縣以守禦功擢浙江道監察御史入

國朝改授兩淮鹽法道調海防兵備道順治四年擢福建

按察使駐邵武時羣盜嘯聚山谷烽火四起亮工酌機宜治軍旅晝開門鬪賊夜居譙樓或長嘯賦詩與刁斗聲相應事平遷左布政使十一年以左副都御史徵擢戶部右侍郎督臣修宿憾訐奏亮工

詔赴閩聽勘比至海寇圍省城撫臣知其才使分城守當一面賊大創去城得完亮工不敢言功仍囚服就質士民訟冤者數百人自獄事起初問官直亮工亦牽連就鞠至

嬰三木無易辭然主讞者卒坐以重法逮入京下刑部訊諸大臣及科道官方就列倏大風西北起掣案牘去堂上下暝晦如夜良久風定吏部尙書某倡言曰天意如此獄可疑因得減死論戍康熙元年

賜環尋出爲青州海防道僉事擢江南督糧道參議復遭劾解職聽勘事解歸秣陵卒亮工能文章名滿宇內自筮仕卽在兵閒才氣橫溢泊歸

國朝爵位通顯忌者益眾方再被論忽夜起傍徨取火盡焚生平纂述凡百餘卷曰使吾終身顛踣不偶者此物

也

府志

王民皞字孟遷臨川人恩貢生安徽宿松知縣縣境有漁蘆課官民交困民皞訴大府請丈量免荒賦民受其

惠擢雲南阿迷州知州州故無城民俾倡議築之歷黃
州岐亭同知夏逢龍亂有保障功擢思南知府百廢具
舉禱雨皆立應以老疾乞休

府志

江球字宜笏金谿人康熙進士庶吉士改御史累官順
天府丞擢左副都御史在臺日久多所建白山西巡撫
與布政交訐四川巡撫與提督交訐球皆請解任質審
著爲例州縣行取交代無定日赴部無定期球疏其弊
申請畫一

朝廷皆可其奏丙戌丁亥視學順天辛卯典北闕試癸巳
典武闕會試凡因緣請託悉禁不行在官三十年淡若
寒素年六十有八卒遺疏

聞賜卹如例

府志

應昇字上治宜黃人康熙鄉舉兄弟三人鼎是晁並有聲庠序鼎晁蚤卒是自有傳昇以母老不求進取篤於孝友著書以終老子霖露霽皆有文名霖歲貢生嘗設義田贍宗族露有孝行雍正鄉舉國子監學正雯雍正進士養親不仕有諸父風霽乾隆鄉舉嘗修清湖陂厚德著於鄉里

府志

楊懋德字服章金谿人康熙鄉舉貴州施秉知縣爲政廉平士民相習有使者微服過邑偶登高覘縣署後圃二老人攜一童子揮鋤種蔬詢之則懋德與其妻也言於大吏薦卓異擢戶部主事晉刑部郎中年七十致仕

府志

應是字敬非昇弟篤學力行晝伍樵收夜讀書康熙鄉

舉絕意進取兄弟日夕侍母耽志著述撰有紀孝編作忠編友于編列女編縱釣居文集讀孝經諸書有司慕其名造訪終不出雍正元年舉孝廉方正以老病辭長子麒康熙鄉舉生有異稟讀書目數行下工詩古文詞尤善書時甯南宜三縣奸民不靖撫臣將發兵麒告撫臣此類烏合不足殲復馳歸請於郡縣令自首免罪旬日間盡解散鄉里晏然與父同舉孝廉方正又舉博學鴻詞皆不就次麟乾隆鄉舉雍正閒學臣舉品行端方以親老辭諸經各有纂著曾孫肇魁鄉舉官上高訓導元孫先烈自有傳

縣志

徐繼昌字方文金谿人康熙進士授山東諸城知縣分校鄉闈得春秋房偶覘書三房所黜卷奇賞之代呈主

試榜發是卷爲李克敬名宿也諸城多世族歲賦五萬餘金在民者不過五之一繼昌謂士族勢重則民多累爲革其弊邑舊設鹽頭駝戶充役者每傾家償額繼昌設法疏通之公私便焉加意學校躬親課士出已資益膏火士益嚮學侍郎李華贈以詩有至今鄒魯遺風在十萬人家盡讀書之句在官七載乞養歸子大樑進士

大材自有傳

府志
縣志

原敬字元功樂安人良曾孫康熙歲貢爲學主居敬窮理實體力行閩撫儀封張伯行聘主九閩書院校正先儒理學諸書歸主白鹿洞講鹿復出枯桂重榮人以爲盛德所致卒祀鄉賢

府志

李紱字巨來臨川人康熙戊子以五經舉本省鄉試第

一己丑成進士由翰林累遷侍講學士歷充武會試考官典雲南浙江鄉試再遷至閣學攝吏部侍郎兼副都御史辛丑充會試副考官被論罷職雍正元年復原官再遷兵部侍郎催漕天津值漕船凍阻紱排羣議請便宜從事閱十五日起米五十萬石得

旨嘉獎出任廣西巡撫時廣西土苗獠獍互相仇殺在修仁者曰十排在天河者曰三疇尤強梗莫能治紱曰惠不知威威不知畏天下無此民吾聞廣西官吏未能絕苞苴營伍多虛籍何以服眾繼自今司道府廳毋取貨於土官土官毋取貨於土民獠獍犯者立劾治劾南甯守及土龍知州嚴飭五十土府州縣於是尙寨官吏相與震聳惟十排三疇有劫斂者紱曰是當用吾威矣手定營

規九整旅而出廣西用兵多在山溪之間徑曲勢險不能用古法紱乃循宋將吳璘疊陣遺意斟酌變通相機赴敵旣成遂咨總督提鎮合兵剿賊凡禽修仁賊渠三十三天河獐渠三十一蠻疆綏靖紱力爲多未二年移直隸總督雍正五年往會雲貴總督高其倬治粵黔分界泗城土司事土官自漢唐世襲二千餘年雄富敵國皆不肯入版圖受官吏拘束時南荒炎熱瘴氣鬱蒸督臣銳意行勦集兵十四萬紱至從容布理正定疆界檄一騎召泗城土司改令歸流事大定旣因入

觀力言河東總督田文鏡參劾黃振國汪誠邵言綸冤抑且言振國已爲文鏡所斃於是文鏡亦劾朋黨護科第屬吏振國且無恙

朝廷方以紱冒昧直文鏡而廣西土司羅文綱適糾眾抗官兵文綱舊爲紱所安插者

詔使紱隻身捕賊自贖紱至文綱自歸有司曰吾不可以負李公事得解將歸會直隸知府曾逢聖知縣王游李先枝皆以事獲罪三人紱先後所疏薦也先枝坐科派罪尤重

上震怒乃削紱職事下刑部議上紱得死罪二十有一籍其家蕭然四壁婦女簪釧皆銅也紱旣下獄飽啖熟眠讀書如平時甘撫胡期恆同被繫歎曰眞鐵漢也時

世宗召廷臣親詰

天威甚厲近臣皆驚悸紱從容引罪而已尋奉

詔赦免令纂修八旗通志乾隆元年起戶部三庫侍郎改左侍

郎時方舉博學鴻詞科紱薦士既眾且廣屬九卿事

聞奏對失體左遷詹事以憂歸起補光祿卿遷內閣學士主試江南在道得疾還以原官致仕

上問有所欲陳否紱以慎終如始對

上賜詩寵其行紱博學強記才力絕人爲學主陸氏嘗言朱子道問學之功居多陸九淵尊德性之見爲卓又云內省不疚生死無足動心何論禍福禍福無足動心何論得失年七十六卒子孝源孝游孝洋皆舉人官知縣孝泳舉人官禮部司務孫友棠自有傳

本傳府志

李茹閔字覆如臨川人居白鷺洲人稱鷺洲先生自幼厲學常夜起讀書或竟夕不寐經史百家皆通貫工駢體文字尤善集唐中歲爲古文得韓歐法度康熙壬午

鄉舉以大臣薦教授

皇十六子癸巳成進士與族弟紱以文名顯京師稱臨川二李在鄉時亦稱南北李茹閔居北鄉紱居南鄉也補官內閣中書以母憂歸紱官廣西巡撫修省志延茹閔

主之

府志

徐大材字聖掄繼昌子少英異康熙五十九年與兄太樸同舉於鄉授廣西上林知縣上林苗疆也大材能以恩威擾其俗邑稱治蠻寇負隅白晝磨眾行劫都司以兵剿失利大材至募鄉兵會營弁伺閒禽之火其巢民始安堵擢刑部主事旋擢山東濟南知府權濟東道訓

泰安再轉兵部員外郎遷刑部郎中

府志

馮詠字夔颺金谿人姿性英邁讀書過目不忘與兄誼

弟謙稱三馮詠康熙進士改庶吉士散館授江南丹徒知縣縣多荒田詠集流亡開墾計畝一千七百三十有三民稱馮公莊尋擢貴州開州知州權思南府事所至勤撫字教禮讓民苗懷之尋以令丹徒時鋤抑勢豪爲所中罷歸杜門著述卓然成一家言謚歲貢生謙以五經中式成進士改庶吉士授檢討與修會典

府志

洪橫秋字一翥臨川人家石獅山下築室曰獅山草堂讀書其中學者稱獅山先生爲書十三篇曰約言論古

今治亂得失凡數萬言

府志

王大勝字峻宇金谿人體幹魁碩膂力絕倫常醉臥大樹下有相者過而奇之謂當以武功顯因私喜自負走南贛從軍初以功授中營把總進千總閩寇犯甯都大

勝奉檄防禦擊賊敗之復石城又征興國峒賊張治進
勦甯都李邨賊皆破之討平龍泉黃塘叛賊又擊贛縣
石峇建節賊於白石擢守備再戰甯都破崖石寨賊數
萬於小源賊遁釣峯漆嶺倚巢踞險大勝率眾攀藤蟻
附進抵其巢大呼奮擊賊驚潰追至浦田羅源降賊首
張明等粵逆僞將軍嚴自明犯南康大勝與副將許盛
合兵焚其木城賊大奔潰追擊數十里斬首萬級尋馳
赴龍泉破賊於城西降叛將胡元亨等擢本營遊擊領
兵平九龍賊寨又追勦吉安逋寇韓大任連破其眾於
萬安雩都瑞金賊竄老虎峒大任竄歸閩大勝遂移兵
上猶討平營前石谿峒賊進權叅將事加都督同知改
補廣西提標遊擊以復象州克馬平功進加都督授鬱

林營叅將改補河池營叅將陝西慶陽協鎮管副將事
大勝起小校三十年積功至大將與士卒同甘苦戰必
身先陷陣所至禁部卒剽掠贛人德之呼爲王生佛及
鎮陝久以老乞致仕旣歸修治祖塋畢歎曰吾由贛起
不忍忘贛人也移家於贛尋卒

府志

李宜民字丹臣臨川人幼孤露依外氏以居長學買楚
中不利之桂林傭書自給嘗偕五人販於太平土司道
病瘴五人皆死宜民夜半若有人蹴之起曰速飲水遂
得無恙傾資殮五人以其柩歸桂林會官軍勦古州蠻
轉餉亟郡官素善宜民引爲助事平謝歸雍正開大府
議兩廣鹽法裁商鬻歸官所在置糶運有司以宜民誠
慤練達令其句當北流旣而桂林柳州潯州太平鎮安

諸屬鹽廩悉任之乾隆戊寅大府復議罷官銷集商運
無敢應者粵商請於大府曰非宜民不可宜民力爲規
畫度支益裕家亦益饒宜民嘗言物聚必散天道也不
善散必有非理散之者故樂善好施不遺餘力以己久
居桂林特捐資修學宮而子孫不以占籍歲在甲戌梧
州大疫道殣相望宜民買棺收瘞歲以爲常自是窮黎
無暴露者又嘗憫數十年來旅櫬在桂林者垂朽無主
告諸當事悉掩埋之親爲立石刊識以俟其後人於家
則葺祖祠置義田構書塾修公所歲寄金以贖戚族歎
歲倍之不能婚嫁者更益之老弱無以治生則月給薪
米蓋待以舉火者恆數十家以子秉禮孫宗瀚貴累贈

光祿大夫

府志

李紘字巨州紘弟雍正進士時紘官兵部侍郎紘深自韜晦殿試三甲不用欣然歸省與羣從子弟講學南園曾開博學鴻詞科朱軾以紘名薦入都報罷歸杜門養母登第十七年逮母喪畢始赴選授鉅鹿知縣調應城地故衝民健訟刁悍前知縣屢以訐去官紘治甫期竟革其俗其爲政日坐堂皇任吏民白事立判遣無稽留者縣西北境產石膏稅銀累千紘白於上官輕其課額莅任三年聞紘告歸遂引疾去官

府志

余棟字東木宜黃人爲學以治經爲先砥節礪行不求聲援嘗教子弟曰吾守儉以養廉一言故無求於人而寡悔於己雍正五年成進士以大學士朱軾薦改庶吉士授翰林院編修入直

上書房

賜第內城會棟喪母

賜銀五百兩給假六月棟乞終制明年父又卒十月馳赴

皇太子喪

上命卽日入直如梁詩正故事棟乞終制如前服闋仍直

內廷

召對稱

旨越次擢翰林院侍讀再遷太常寺少卿兼督四譯館以陳奏

不合改官乞假歸里卒

府志
縣志

黃師範字任箕金谿人雍正八年進士授刑部主事居
半載諳法家言遂總司事時尙書侍郎以擬稿第屬官
能否師範日代同官爲之俾自呈閱同官以是多得薦

補外而師範老於郎官積久擢員外郎再遷禮部郎中
年七十致仕歸卒年九十師範三爲鄉會同考蔣櫟錢
載皆其所取士府志

陳象樞字馭南崇仁人十二歲能古文與周學健帥念
祖齊名以五經兩中副榜貢生

特旨一體會試雍正八年成進士大學士朱軾昌言於朝曰吾
鄉知名士也授吏部文選司主事遷郎中兵部尙書甘
汝來薦加翰林院銜督學四川蜀人奉其教合前學使
陳瓚稱二陳夫子蜀中自渝以下江最險夔人士舊試
於渝象樞曰奈何予多士以危自往按試夔有考院自
此始再視學楚南如在蜀以母喪歸乾隆十五年

詔起用舊臣十四人皆九列象樞以部郎獲與在職三年實事

求是以勞疾卒門人私諡曰貞文先生

府志

藍千秋字長青宜黃人少穎異觀書一覽輒盡爲諸生
屢困鄉闈雍正三年

詔直省學臣舉人品端方有猷有爲有守之士備擢用江西學
臣舉士三千秋其首也引

見勤政殿以朱軾薦充明史館纂修未幾授國子監學正累擢
盛京戶部員外郎分地畝司有恃貴豪佔民田者千秋
據理折之無所顧忌旣而乞歸生平不屑細事思以經
術經世凡用兵治河籌海備邊屯田水利靡所不究自
以未竟其用飄然有遺世想於宅東鑿一池築室其上
顏曰東塘曰吾老於此中矣工詩古文不苟作臨川李

紱咸推之

府志
縣志

傅涵字聖涯臨川人博極羣書尤工詩詞早歲與李紱倡和最密紱爲詩文下筆如飛吳越士皆屈服顧獨稱涵敏乾隆二年應博學鴻詞科卒京邸

府志

李秉禮字松甫宜民子多聞好學胸次超曠官刑部郎中未幾歸桂林養親不復出秉禮工詩宗唐韋應物嘗名其所居曰韋廬廬前石曰韋石錢塘袁枚遊桂林引爲詩友又因袁交高密李憲喬憲喬嘗謂詩須有安身立命處不輕許可獨於秉禮詩有心賞隨篇論定爲之序跋及憲喬卒官永福負官逋秉禮爲代償周卹其家歸隱高密嗣是有絕絃轍斤之感編其所論定者爲內集未論定者爲外集子宗瀚自有傳

府志

吳琯字西獻宜黃人乾隆進士河南商水知縣多惠政

分校鄉闈薦士多名宿已而以事解任巡撫胡寶瑔上疏薦舉再任山東莘縣會河決捐俸督民築隄未幾謝職歸莘人思之不置

府志

李友棠字召伯紱孫父孝源康熙舉人歷知廣西桂平廣東和平諸縣友棠天稟絕倫年十四巡撫常安欲以博學鴻詞薦祖紱以年尚幼辭之乾隆丙辰舉於鄉既成進士由翰林充三禮義疏續文獻通考兩館纂修官補授福建道監察御史巡視西城京師地大物博萬族雜處友棠令所屬旅寓日進人數簿籍夜或突往察其多寡有不合冊者輒訊蹤迹科斷其罪非類無所容止嘗出巡臺灣臺在海外與異域互市商賈有通事者奉金進謁友棠正色拒之通事出語人曰吾謁官長多矣

未有氣肅言厲如李察院者既督學福建以疾召醫疾愈醫者欲爲其子陳乞友棠曰汝欲居功乎吾豈以公事償私勞者累遷工部右侍郎工部錢法例歸右院專轄友棠以庫吏素侵蝕欲倣戶部錢局例設檔冊以稽其出入議格不果行友棠敷歷中外三十年

高宗聖諭嘗稱江西曹秀先李友棠學問皆好辦事則友棠更優未幾緣事落職戴罪家居以祝

釐入都給三品銜

府志

黃捷山字仰甫宜黃人乾隆進士山西太原知縣劉墉守郡才之以卓異薦調永濟爲陝甘蜀衡途故事鄉里按戶口出馬謂之里馬捷山足官馬額數革里馬民無供億之困擢知絳州州土貢羊皮舊定官購減市價之

半捷山禁強鬻者嘗以邑富民苦充鹽銅商大府檄至

輒爲祈免而不以市德遷河南陳州知府

府志縣志

袁文邵字楚材崇仁人乾隆鄉舉官內閣中書文邵兄弟六人友愛無間言鉛山蔣士銓詩曰一花作蓮屋眾佛得所安鳳凰散竹實鵲鵲急其難孝弟古之人爲君發三歎爲文邵詠也嘗派辦

武英殿四庫全書監督裕豐儲濟倉

上賜福字及荷囊異數也

府志

袁文觀字海門崇仁人乾隆進士初官同官知縣廉敏爲一省冠遷禮部郎中乾隆辛卯典試福建稱得人出守施南多惠政坐失察戍貴州主講武陽書院學者宗之後奉

特旨釋歸府

志

江西通志卷一百五十四
撫州府

夫

蘇運昌字定與金谿人乾隆鄉舉授興國縣教諭擢南康府教授皆善於其職截選廣西初權永甯州州雜獠搖亡禮教運昌至廉其地有邪神男女私約皆禱焉立毀其祠而治民之無行者俗爲之變時辰州苗叛武弁獲楚言者二人指爲苗運昌詢其籍里姓氏皆非也欲釋之弁固爭且以妬功讒於鎮帥於是司道檄員會鞠運昌曰掠治急且誣服矣請移關其家屬眞僞立辨從之事果白補靈川知縣移知賀縣縣巨猾聚黨橫行前令不敢詰運昌誘之至縛於獄夜發健役火其巢獲數十人昧旦斃猾杖下刑從犯有差閩邑相賀諸生某家富爲姦民所誣納千金求寢卻之趣訊得其情杖姦民

而釋生生大感復以所卻金進運昌召入訓之曰雪枉令職也何爲汙我生惶愧而出運昌常自言令之失職莫大於不勤一訟累月則業荒一案經歲則家破姦猾傾陷吏役貪恣皆由是卽廉也毒民已多矣時以爲名

言

府志

蔡上翔字元鳳金谿人乾隆進士四川東鄉知縣在官八年政尙嚴肅問遺無受請寄無聽將歸告人曰吾居此了無所異數十年後必有思我者上翔生有異稟蚤歲喜爲縱橫馳驟之文晚沈潛於唐宋大家著王安石年譜以安石爲新法受謗本陸九淵說博徵羣籍力辨之

府志

何飛熊字渭綸金谿人乾隆鄉舉七試禮部不遇官定

南廳學正少厭俗學嚶嚶自處嘗言萬物愈高愈細亦

愈孤蓋以自況也

府志

周肅文字履剛金谿人未冠補邑諸生父沒於黔歷萬里扶輓歸盡喪其資家居授徒以養母安貧讀書吟嘯

自得成乾隆進士官南康府教授

府志

鄭飛鵬臨川人乾隆武舉補福建邵武營千總緣事降補建甯鎮中營把總五十二年臺灣賊林爽文倡亂飛鵬隨大帥赴剿戰歿事

閩給雲騎尉世職

府志

徐昱字捧曦金谿人生有至性年十八父沒於滇隻身奔走數萬里卒負骸以歸舉乾隆戊子鄉試授湖北宜都知縣有能名奉檄督萬城隄工工訖

上命大臣按視稱善題補監利擢沔陽知州移攝宜城縣時教
匪起當陽邑之河東爲衝要地羣匪聲言渡河民衆洶
懼昱募鄉兵三千人分守城內外躬屬韃佩刀晝夜巡
警嘗行城西迹偶語者二人執而鞫之皆吏胥與賊通
者斬以徇移牒營官縣尉督鄉兵涉河擊賊三敗之境
乃安晉秩同知還沔陽以繼母憂歸服闋至湖北讞來
鳳縣獄事竣卒於施南嘉慶十年督撫奏昱積勞病故
卹贈知府廕一子縣丞

府志

王謨字仁圃金谿人乾隆進士才識雄雋精力過人自
少卽疾俗學好博覽以江西通志詳今而略古著江右
考古錄補其闕閒爲辨正譌舛考訂同異旣又以六朝
五代人物廢闕江右人文見於史者多疏略乃搜羅舊

聞別爲豫章十代文獻略謨初登第授知縣乞改學職
選授建昌府教授以實學訓諸生後進景附人才輩出
嘗輯漢魏遺書之僅存者片詞隻義無不甄錄爲經史
說部鈔所得凡數百種致功良深年七十六卒於家府志
紀大奎字向辰臨川人少時父示之易象曰易學心學
也大奎於是研精殫思以求天人之故盡通陰陽厯算
及壬遁之術乾隆己亥順天鄉舉分發山東知縣權知
商河李文功等倡邪說將誘民爲亂訛言四起大奎集
縣民諭以禍福皆驚愕乞命他郡被惑者聞之亦相率
解散厯權邱縣昌樂棲霞福山博平民皆敬而親之閒
兩親喪一夕骨立見者悲詫解官歸有終焉之志嘉慶
中大吏強之出任四川什邡知縣或謂什邡強梗宜示

以威答曰無德可懷徒以威示於民何益未幾縣人士
競爲詩歌頌德大奎謂同官曰無德且懷況有德乎先
是奸民吳忠友據高山聚眾積粟講清涼教大奎偵知
其事躬率健役夜半擣其巢獲忠友餘眾驚散下令受
邪書者三日內繳予自新民遂安居邑舊有禹母祠在
九聯坪洛水山焉大奎攷禹生時有洛書之祥洛書八
方皆合十數以爲什邡命名之所緣起自著其說爲前
人所未發擢知合州州爲宋儒周子寓居大奎祀周子
合宗書院作示學者一篇發揮希賢希聖之學道光壬
午引疾歸嘗言居官有十字訣朱子所謂虛心不昧具
眾理應萬事是也又言此虛靈者朱子謂人之所得乎
天古人爲學未有不本於天者不離乎天則虛靈自現

不昧之用生矣年八十卒祀鄉賢祠合州名宦祠

府志

應先烈字鴻箴宜黃人乾隆鄉舉官隴西知縣教民種桑育蠶數年鬻繭成市隴西歲多雹傷禾稼土人相傳馬營監有深潭每雨雹必先日霧起令竭其水潭底蛙無算大者如斗盡斃之患遂息調安定地當孔道馳驛往來數借民間車馬先烈出資造車三百輛民力不困復調皋蘭枕河多水患設礮岸版壩十三座障之適荒歲艱輓運黃河流急不能載舟先烈創用牛革儲糧聯十二革由西甯順流下民不苦荒旋擢知肅州封金礦開酒泉故流灌田數百里權知蘭州循化撒拉生回不馴大府欲勦之先烈以單騎縛其魁黨羽驚散以楚北軍功

賞戴花翎補授湖南郴州擢常德府郡北界洞庭湖田數十萬

頃水漲歸漁水落歸耕課無定主互有爭攸先烈躬自
正定疆界犁然無所滑洞庭行旅多劫殺莫知主名先
烈遣役駐兩岸記渡者姓名迹得之行劫者爲舟子寘
諸法行旅晏然累官貴州安順知府歿祀常德名宦祠
府志

李崇禮

原名禮

字建中宜黃人父乘龍雍正拔貢宗學教

習居京師十餘年母梁南豐布衣份女通經史能文崇
禮幼受母教八歲試有司爲弟子員十二鎮於庠與裴
曰修彭元瑞齊名乾隆庚子成進士以母老乞改官選

瑞州府教授嘗著章水經流考元瑞爲之跋

府志

楊護字邁功金谿人十歲能文弱冠膺鄉舉乾隆進士

授刑部主事總辦秋審執法持平運同某妻忤姑姑責之自經死妻家故權勢運同懼伺夜以千金詣護求解護曰吾知準情酌理耳抱幼子示之曰吾年五十五長子夭此子甫四齡敢鬻獄乎謝之去高太監者黨於大學士和珅遂訟其弟妻護按律擬杖贖守夫墓和珅方總刑部駁詰嚴厲護爭之珅叱曰司員何敢爾護厲聲曰司員主稿知爲刑獄得其平耳何叱也珅不能奪未幾珅敗擢員外郎

仁宗召見齋宮嘉其守

命督餉四十萬赴川濟軍川陝督撫交章薦授陝西分巡延榆綏兵備道時

上方以有司治三省叛產未善寄

諭陝甘總督當得公正大員如陝西之楊護者故凡履勘守禦

諸事悉以命護護受任周歷田野覈復民業過半經略
請遴員卹難民詔曰愛民賢員如四川劉清陝西楊護
可任遂復以撫卹事任之陝撫嘗惑叅將言使府縣預
選壯丁詣營備補行伍護爭之曰農工商賈各有業也
若預選送營曠日失業與抽丁何殊遂止尋調甘肅平
慶涇鹽法道擢安徽按察使斬六安州賊劉成巨軍民
歡忭升江甯布政使淮揚大災奏發帑百四十萬賑飢
護白與弟諤乘舴艋周歷邨莊訪問疾苦居給無遺吏
不欺隱縛筏渡高寶湖流急幾覆災黎爲之泣下坐事
降同知歷遷知府至浙江巡撫以不俟代先期北上復
降禮部主客司郎中引疾歸道光五年重宴鹿鳴加四

品卿銜年八十五卒

府志

楊謨字春圃謨弟少篤學研究恆達旦甫冠舉乾隆鄉試授南城縣訓導遷分宜教諭截取知縣不赴晉大理寺評事謨生有至性母聶患腸澼醫言糞甘則不可治謨嘗之果甘母旋歿躑躅幾絕父病夜馳百二十里省視衣不解帶者再閱月事兩兄以恭稱工爲古文辭桐城姚鼐新城陳用光稱之子祖敬孫士達並舉人

府志縣志

程卓樑字肩宇宜黃人乾隆進士授主事改官貴州開泰知縣擢都勻府丹江通判嘉慶時仲苗作亂黔撫馮光熊自銅仁馳安順大帥勒保常明白川楚會剿卓樑言壩陽爲廣順要害廣順危則全局皆震因指陳形勢

常明以爲善令往壩陽練鄉兵未至壩陽已陷立具狀以聞並獻復壩陽策大帥壯之以任卓樑遂輕騎抵大寨招降順苗李連成以苗攻苗遂復壩陽降諸寨毀賊巢論功擢普安州知州

賞戴藍翎再擢台拱同知權興義府事授黎平府知府會銅仁苗又亂乘不備走險道入羣苗方欽一鼓獲之上功

賞換花翎累官貴州糧儲道直隸大順廣兵備道進廣西按察使權布政使兼護學政尋以失察呈吏議年八十卒

府志

志
蘇

傅顯功字照倫金谿人幼喪母事繼母以孝聞乾隆鄉舉官興國訓導訓諸生以學嚴氣正性不可干犯卒於官子馴進士戶部郎中

府志

李宗瀚字公博秉禮子繼諸父秉仁爲後乾隆進士改庶吉士散館授編修擢贊善典福建試所得多宿儒時號老人榜轉侍讀學士督學湖南宗瀚素敦品厲學至是以其行能勉羣士士悅服之多所成就晉太僕卿累遷左副都御史宗瀚本生祖母戴年旣老宗瀚乞終養戴卒是年爲道光三年先是道光改元禮臣建議天下爲人後者爲本生祖母終三年喪至四年部議仍改歸期服遂持期喪起補原官晉工部侍郎八年典試浙江旋奉

命留浙督學識拔無虛士十一年本生父秉禮卒於家宗瀚年已六十有三旣聞訃慟絕復甦發舟次衢州長號而絕將殮進朝服臂屈強不得伸子聯珂泣請曰吾父以毀

終其意在喪服乎乃易衰麻臂始伸宗瀚家世貴戚又少年得科第性獨純厚有器量方官副都御史與同官治某案疑而爭之不可退具疏將入告或謂某御史聞公語將駁是案劾臺長公固宜言宗瀚曰若然吾姑緩以待之吾特求是案信耳豈諉過哉御史某果入告臺官皆干議

仁

宗聞其事詢之宗瀚惟白引咎人服其量居鄉杜門卻軌或

乘輿獨游與樵牧雜處人不知其京朝貴官也工書受撥鐙法於大興翁方綱與莆田郭尙先道州何浚漢吳縣顧蕓齊名子八聯珂舉人聯琇自有傳孫翊勛翊煌

舉人

府志 好
雲樓集

邱鳴泰字讓廬東鄉人乾隆鄉舉大挑知縣權山西平

陸縣洪洞民聚眾抗糧上官檄鳴泰莅洪洞不閱月而糧集補官偏關量移陽曲時汾河水偪旱西門堰決隄民大驚擾鳴泰禱於河神越夕水西去挑濬河沙隄遂復完道光初以特薦擢廣東欽州累官福建按察使懲洋盜禁械鬪海疆積習爲之一變權布政司請奏免荔枝貢飭停龍巖州蘭花供官民大悅厯官湖北安徽山西布政使護山西巡撫以督審遲延降調回里卒府志甘揚聲字實求崇仁人乾隆鄉舉官河南知縣初權澠池致嘉禾之瑞兩官杞縣有政聲再至任黃河決杞當其衝揚聲率民防守目不交睫者七晝夜全活無算護城故有隄水退補柳數千樹十餘年成固隄以益固民呼甘公柳一權許州固圉空虛民戴之爲刊石於獄門

府志

吳士杭字懷舟東鄉人乾隆鄉舉爲諸生時受知於學使翁方綱目爲艾南英後一人士杭工詩宗唐張賈尤長於五言嘗客桂林著粵游草李憲喬稱其嶢然冷然凌霜拔俗又盛推其文比之樊宗師士杭不自足也年逾五十猝中暍卒

府志

鄧時字蓀洲崇仁人寄居郡城選拔貢生官義甯州學正工詩能爲合體書仿漢隸有神會督學翁方綱稱之

府志

陳之蘭字謙儒臨川人際泰曾孫爲諸生九試不售而文益工撫州知府朱展勤政事嘗以利弊訪之蘭言之而不及私展多善政之蘭與有力焉

府志

陳兆鼎字五貞象樞子諸生穎敏嗜學旁及象緯形家
言方父官京師兆鼎省侍游太學獲交當世士歸絕意
仕進肆力於古手一編不輟嘗慨邑乘廢缺博徵文獻
得十餘萬言爲知縣江啟澄所假不歸時兆鼎已老復
憶而錄之存原本十之三四

府志

王曙斗字律三東鄉人諸生父商於金陵以家事付曙
斗戚某負千金不能償曙斗還其券或咎其自專曰此
吾父意也乾隆三十六年

詔減天下田賦曙斗語佃人勿輸租曰吾家受

國恩良厚俾若輩無田者同拜賜也

府志

朱嗣韓字仰山金谿人好讀書落落自得不以貧窶動
心嘗冒雪乞米走十餘里不得爲探梅詩而歸其高致

如此年六十始成進士授戶部主事每休暇苦讀如故
操守廉謹不踰尺寸年七十卒同年生武甯盧浙歸其
櫬廣東徐旭曾爲之傳孫履恆舉人亦有文名屢試不
第遂從戎積官至江蘇候補道

府志

黃旭字照人宜黃人乾隆癸卯優行貢生迎

鑾江甯上河清海晏頌

召試鍾山書院入二等

賜文綺嘉慶己巳成進士入詞館進

萬壽詩冊書用雙鉤小楷復蒙

上賞

府志

吳嵩梁字蘭雪東鄉人年十五卽以文字爲金谿楊護
所知結忘年交未冠赴金陵應

南巡召試歸受詩法於鉛山蔣士銓得杜陵宗派出游吳越聞
詩名籍起嘉慶庚申舉鄉試官內閣中書名振都下青
浦王昶北平翁方綱無錫秦瀛蒙古法式善錢塘吳錫
麒並相推重篇什流播及於海外朝鮮侍郎申緯推爲
詩佛吏部判書金魯敬父子鏤梅花爲龕奉其像並置
所爲詩卷嘗於仲春日集其國勝流置酒高會遙爲嵩
梁祝壽好事者繪圖張之琉球陪臣向邦正奏請入監
肄業亦出嵩梁門下學成歸國奉使來朝者皆以得其
詩句爲榮會玉牒館議敘嵩梁出知貴州黔西州移權
長寨廳同知兩充鄉試同考官兄崑榕工文精篆隸女
弟素雲善繪事崑榕子晁爝亦能詩一門皆以文字翰

墨著稱

府志
縣志

樂鈞字蓮裳臨川人生而警敏甫成童詩古文已成集
世所傳耳食錄前後編二十卷皆少作也乾隆己酉學
使翁方綱奇其才拔貢成均嘗館怡親王邸雅相敬禮
嘉慶辛酉舉於鄉應春官試不遇歷游楚粵江南大吏
聘主梅花書院遂之揚州鈞才思豐豔執駢牛耳者
幾十年大江南北一時知名之士罔不心折甲戌丁母
憂哀毀卒孫楠幼慧如其祖父父卒於越徒步數千里
扶輓而歸家酷貧日謀甘毳以奉母並推母意均諸弟
妹而已與婦斷齋畫粥母弗知也篤志讀書一鐙熒熒
常至達旦中道光癸卯舉人府志
饒向榮字繡圃東鄉人幼穎敏未三年盡誦論孟五經
嘉慶辛酉成進士壬戌補

三

殿試改庶吉士散館授主事累擢郎中京察上等旋卒向

榮爲學有原本未竟其用人惜之子炳虞能文府志

黃錫媛字仲佩捷山子入塾授小學已見諸行事與弟

錫禕同補諸生乾隆間迎

鑾金陵嘉慶壬戌成進士

朝考第一入翰林散館授戶部主事甫數月以母老引疾

歸游心著述篤志孝養文行並稱於時府志

洪占銓字鳳賓宜黃人宋忠宣公皓之後嘉慶進士改

庶吉士散館授編修以詩受

上知出爲陝甘鄉試考官占銓嘗念忠宣父子兄弟文章氣節

家學不可失墜因徧求遺稿寘座右顏所居曰小容齋

府志

謝階樹字欣植宜黃人嘉慶進士及第授翰林院編修
庚午順天鄉試甲戌會試同考出督學湖南累官至翰
林院侍講學士初階樹視學湖南適湘潭市人與江西
估客鬪成大獄督撫不能決階樹試竣入都

上問訟曲直階樹奏對平允

上深嘉之

府志

劉庠麟字浴香崇仁人嘉慶鄉舉生有至性事繼母稱
善無閒言爲學以主敬爲入德之門淮南萬應新孔繼
鏐樂邑游閔鄒嶧賢皆其高第弟子

府志

羅以豐字實之宜黃人嘉慶進士以豐有材武方會試
北上遇盜劫行旅以豐舉所坐小車擊賊賊賊遁旣成
進士改庶吉士散館授陝西盩厔知縣盩厔巖疆在萬

山中僻徑叢雜寇盜伏莽以豐旣入陝偕兄以靖徒步之官歷行窮鄉廉得其實乃率兵入山獲積寇國正元等十三人大府上其事

上嘉之晉知州銜再改授山東壽張調冠縣卒

府志

湯儲璠字茗孫臨川人父兆紅乾隆舉人蓮花廳學訓導儲璠生而穎異讀書過目成誦嘉慶庚午以第一人舉於鄉明年成進士官內閣中書進奉文字多出其手歷數年病作閒數月赴內閣忌者欲令去官大學士曹振鏞持不可曰此今之燕許也安可少此人會逆酋張格爾就俘諸舍人擬賀表未就振鏞以屬儲璠伏枕構思古茂淵懿會病日篤又念母老乃乞假南旋舟中輒有吟咏爲布帆無恙草其望海船一篇憂深思遠見忠

愛之心焉子安淮庠生寶中舉人

府志

鄧應臺字伯華金谿人嘉慶鄉舉歷貴州諸州縣初之
婺川政明察吏莫敢欺居恆置簿籍錄四境良莠準施
賞罰民駭服呼鄧青天印江巨盜田大官力敵百夫多
羽翼不可捕有婦人呼於按察使願得鄧青天治盜按
察使以屬應臺未幾竟執大官賓之法擢古州同知權
思州銅仁思南諸府鎮遠久潦民苦饑應臺自往勘不
俟報可發倉廩賑之仁懷謝法眞構亂旣平檄應臺治
其獄獄具督撫才之將上聞應臺讓功同列人益賢應
臺除大定府知府未之官調貴陽爲木棉圖教民種時
設局導紡織民利其利擢湖北漢黃德道權按察使武
岡民聚眾戕官官兵駐寶慶謀攻勦奸民益集相持半

月未解應臺奉檄往授眾軍方略自偕十餘人入武岡鄉民遮道羅拜曰此鄧青天耶吾儕生矣乃訴營弁諸不法應臺撫卹之械營弁定罪斬決諭縣紳縛渠魁自獻歷三日而事定旋以疾乞歸

府志

李占星字仰台東鄉人兄弟友愛至老彌篤占星有子五人曰文翰文彬文錦文元文瀾並承家訓食指千餘咸有禮法時稱義門蔭南李氏

府志
縣志

謝廷恩字清德崇仁人幼貧長學賈入蜀遂以資雄一郡然能慎取舍敦善行人以是稱之有子五人次子蘭生博學多通道光進士以知縣用不樂爲外吏援例授工部郎中未幾卒著書甚富四子蘭墀增貢生刑部員外郎咸豐中粵賊擾撫州佐府縣治戰守捐私錢十二

萬縉以給軍五子蘭積以孝聞同治九年

旌表

府志

黃爵滋字德成宜黃人道光進士翰林院編修累官禮部刑部侍郎再典江南鄉試一典山東鄉試兩充會試同考官所取多知名士

宣宗廣開言路先後擢臺臣敢言者置列卿以爵滋爲之首爵滋陳六事曰察天道廣賢路豫備將材控制匪民整飭京營堆撥申嚴外夷防禁略言中國與外夷互市原有地界近夷人錄述中國情事潛繪山川形勢我示之弱則彼強我示之強則彼弱威制之道不在臨時張皇在平時振作奉

旨飭堆撥肅夷禁如所請行又陳漕河積弊旋上請塞漏卮疏

謂近年銀價遞增非耗於內地實漏於外洋蓋自鴉片流於中國爲害日深耗銀之多由於販煙之盛販煙之盛由於吸煙之眾今欲夷煙之不來必先加重吸煙之罪給限一年許其改過若仍吸食罪以死論見任文武犯罪同科禁其子孫不准應試並令滿漢營伍一律禁食凡失察者罪之漏卮塞然後可講求理財之方也奏入

上嘉許得

旨下各督撫將軍嚴禁鴉片之害自明季迄今閱數百年至是始知以有用財填無窮壑實爵滋一言發之其奉

命查辦福建海防也又請禁漳泉所屬行用夷錢及英吉利內犯復上籌辦海防疏大旨言承平日久水師廢弛兵額

多闕戰艦不修宜召募助攻守集艇船資駕馭嘗爲海防圖二卷表一卷遭父喪歸未幾戶部銀庫虧絀案發坐失察落職服闋賠繳得

旨以員外郎用尋卒

府志

樂衡字蘭史東鄉人淬厲於學爲諸生讀書廬山三年不歸道光鄉舉累試禮部不遇留京師十餘年以教習官浙江知縣歷權遂安歸安長興皆有聲補嚴州建德時賊陷杭州上下交警又兼攝壽昌以勤事卒衡工文詞善書尤具知人識累爲鄉試同考稱得士

府志

許道藩字懿修宜黃人道光進士官安徽知縣權銅陵補霍山調鳳陽所至稱治膺卓異薦擢壽州知州俗素悍嘗渡淝捕賊中流風猛同舟武弁不敢進道藩奮力

往獲積蠹王天祐置之法會有

旨各督撫舉所屬才能可任兩司道府者皖撫程懋采以道藩應旣而憂歸起補四川敘州府知府敘州接壤滇南多獠寇道藩自練兵禽獠目紅鷄公旣歸流言殺賊日賊黨將屠城道藩笑曰此賊餒也斬紅鷄公督兵出餘賊潰遁建石碣於老君山擢建昌兵備道再加鹽運司銜

府志

游閎樂安人道光鄉舉性嗜古於書無所不窺日與師友切劘爲經世有用之學嘗撰物理分配五行圖中庸字義分合圖說學者稱白齋先生

府志

張廷槐字蔭三宜黃人副貢生選授永甯教諭卓異升知縣分發安徽署祁門尋調繁昌並有政聲咸豐三年

賊犯縣境有獄囚陶謙以勇力著廷槐出之命集團丁
禦賊斬十餘級賊遁其冬賊復至以數萬眾攻南門廷
槐固守手然巨礮擊賊賊稍卻乃由北門填濠上城遂
陷廷槐麾軍巷戰力竭死之贈知府

特旨建專祠予雲騎尉世職謙亦戰死附祀於祠

府志忠義錄

李希郊字朝俊金谿人道光進士授兵部主事累官江
南道監察御史上疏請

敕各省大員力屏因循以救時艱又請申棄城逃避之典嚴留
營贖罪之防咸豐九年出知處州郡經賊擾瘡痍未復
希郊加意拊循未幾賊陷江山常山偪遂昌遂昌爲處
州藩籬處又溫台門戶希郊稟省請救援道梗莫達告
急於溫處道書二十餘上漫不理麗水土賊復嘯聚鄉

兵多潰賊旋破遂昌竄入松陽乃率親軍百餘屯堰頭扼麗水松陽界賊猝至督軍奮死力戰希郊被數槍血流至足猶持刀罵賊賊執至碧湖支解之族弟希沆僕李深同時死團勇從死者殆半事

聞贈太僕寺卿入祀昭忠祠事蹟宣付史館蔭世職子寶銘咸

豐進士刑部主事

府志

李守誠字靜章宜黃人由拔貢官新淦教諭尋中順天鄉試座主許乃普閱其文曰異日必爲盡臣咸豐四年選江南六合知縣厯署江浦如皋以清儉愛民爲務六年回本任遵前令溫紹原成法事事就理歲大旱盡心撫卹開倉平糶兼辦軍需費集而民不擾八年春賊犯縣日夜守禦援師次江上迎之不至乃閉城誓以死守

九月城陷衣冠縊堂上賊裂其屍焚之

詔贈知府廕卹如例並准立專祠守誠始蒞任恂恂率職紹原

方以道員筦六合軍務頗疑其怯旣而察其誠樸深重

之其居京師聞鄉人張廷槐殉節繁昌慨然曰吾輩他

日當如是矣及是果死難

府志忠義錄

吳偉南字紫竹原籍金谿人先世官蜀遂家重慶年十

八隸行伍累遷至遊擊坐事落職入楚中隸提督塔齊

布軍營從征有功復原官旋授岳州營參將馭士卒嚴

而有恩賊至屢卻之咸豐九年滇賊圍敘州偉南自湖

南募勇赴援力戰殺賊又赴成都請益師以吉勝軍左

營隸之十一年擊賊於縣竹塘坊所部僅五百賊當之

輒靡乘勝抵其巢遇伏被十七創仰天歎曰一死報國

耳遂自刎

賜卹如例川督駱秉章奏請崇祀名宦祠並次其戰功暨死事

狀牒本籍附祀昭忠祠

縣志忠義錄

陳偕燦字少香宜黃人道光鄉舉嘗遊齊魯燕趙吳越閒以詩鳴又工書善繪事以教習敘官知縣分發福建權長泰惠安皆有政績分校鄉闈得士林昌彝等多知

名者

府志

艾暢字至堂東鄉人父方來有孝行暢幼讀西銘悅其言卽刻勵爲學嘗從族父書綸受詩古文法鑿壁納銚倚誦達旦道光中成進士先是暢大挑二等例先補教授官臨江者七年截取補廣東博羅知縣在官一年慨然曰是不可以行吾學也遂乞歸暢通經學尤長治詩

轡事佔畢乎遂入提督向榮幕參預軍務以功授知州
銜候補府經歷咸豐六年金陵大營潰退守丹陽紹鴻
力戰傷左臂洎榮歿從別帥德興阿駐軍天長賊眾百
萬至德興阿所部僅數千人欲先以身殉而麾士卒去
紹鴻曰將以戰爲事賊至不擊死何裨今士卒皆知必
死戰而捷一軍得完卽不捷亦可以挫賊鋒從其言鏖
鬪竟日殺傷過當德興阿死之或勸紹鴻易服遁紹鴻
不可亦死之奉

旨優卹予世職祀昭忠祠

府志忠義錄

周善繼字心傳東鄉人咸豐七年撫州賊分竄屬縣鄉
民各舉團練善繼集丁壯守相公坳坳處叢山中出入
僅一小徑賊至扼險擊之斬賊目二人殲賊甚夥忍饑

苦鬪不少懈賊屢攻屢卻乃佯敗誘之善繼追及坪裏
邨方鏖戰別賊躡山巔自坳而下天大雨火器不得施
眾遂潰善繼力戰死同時殉者五十九人周族爲多

府志

義錄

徐思範字易三金谿人監生粵賊踞縣城禁薙髮邑紳
士率不冠思範與其兄監生思轍獨薙髮冠戴如常賊
掠其鄉思範精技擊集眾與鬪手殺數賊卒以眾寡不
敵與思轍同被執死之子受伯弟體三從子全喜並戰
死邨中死者幾三百人

縣志
忠義錄

江西通志卷一百五十四

江西通志卷一百五十五

列傳二十二 建昌府一

唐

危全諷南城人

原作臨川南越人

世爲農夫初生赤而毛醜狀

駭人及長體質明秀豪勇任氣乾符末所在寇亂全諷

聚眾保鄉里繼從安撫謝肇討賊帥黃天感等期年悉

平中和五年詔以全諷爲撫州刺史招懷亡散百廢具

興全諷在州敬愛賓客善撫士民多所興辦今城郭館

署皆其遺構也

九國志首載周迪傳今刪謹案舊志

危仔昌全諷弟歷官新撫饒信四州刺史黃巢黨黃可

思竊發擾害鄉閭初戰弗克後復陳師鞠旅一戰卻之

林志

元德昭字明遠仔昌子以危字刀下有卮改姓元居家
孝友事吳越掌文翰用兵於閩機務悉以委之厚重多
謀有輔弼才師旅戒嚴議者盈庭德昭至則他論自息
累官至丞相贈太保

林志 謹案德昭爲淮南兵所逐奔杭州遂仕吳越

宋

曾致堯字正臣南豐人李氏有江南撫州上致堯進士
第不就太平興國八年乃舉進士召見拜著作佐郎知
淮陽軍留直史館除祕書丞兩浙轉運使魏庠知蘇州
介舊恩以進致堯劾之上曰曾某乃敢治魏庠可畏也
言苛稅一百三十餘條罷之移知壽州轉主客員外判
三司鹽鐵勾院遷戶部員外京西轉運使歷知東泉蘇
揚鄂五州終戶部郎中所著仙臆羽翼二十卷廣中台

志八十卷清邊前要五十卷西郵紀要爲臣紀要三卷

直言集五卷文集十卷傳於世尤長於歌詩云

王臨川集白

志舊按致堯鞏之祖人物志林志以爲五代時人載入撫州又入建昌今據安石撰志節錄改正

曾易占字不疑致堯子以蔭補太廟齋郎爲宜黃臨川

二縣尉舉三法司中進士第改武勝軍節度掌書記不

往用舉者遷太子中允太常博士知如皋玉山二縣被

誣歸卒子六人燭鞏中宰布鞏始易占以文章有名既

仕不合卽自放爲文章而時議十卷尤行於世

王臨川集謝

志舊案曾易占以子貴贈魯國公林志失載白志采荆公撰曾太常墓志增

陳彭年字永年撫州南城人幼好學母惟一子愛之禁

其夜讀彭年篝鐙密室不令母知太平興國中舉進士

調江陵司理參軍眞宗卽位上表言事召試遷祕書丞

景德初直史館兼崇文院檢討獻大寶箴預修冊府元
龜遷右正言數有建白進工部郎中加集賢修撰遷諫
議大夫兼祕書監同修國史眞宗奉祠太清宮丁謂爲
經度使以彭年副之國史成遷工部侍郎參知政事求
罷不許卒年五十七贈右僕射諡文僖彭年性敏給博
聞強記貴至通顯所得俸賜惟市書籍大中祥符閒附
王欽若朝廷典禮無不參預所著文集百卷唐紀四十

卷

宋史

危拱辰字輝卿南城人淳化進士性純孝年十五代父
爲吏題新月詩云未審初三月嫦娥怨阿誰嬾開十分
鏡祇畫一邊眉邑令見而異之命拱辰專儒業後官至

光祿卿

林志

鄧希顏字子皋南豐人咸平進士累官大理司直兼侍

御史以讜論爲眞宗所信重

林志

江白建昌人景德進士父禹錫有節義高年不仕躬自教授祥符初獻東封詩十五篇有詔嘉美賜以粟帛歲時遣使存問五年卒白自鄞尉罷還負土營葬廬於墓側藜羹芒屨晝夜號泣將終制猶然轉運使以其狀聞詔賜帛十二疋粟麥二十石醪酒十缸

宋史謝志舊案江白前志重

見南康府人物今據府志改

吳奎字成象南城人六歲能厯覽子史五行俱下目不再覩大中祥符二年與臨川晏殊應賢良詔時年十一眞宗甚優異之三賜璽書

林志

黃曉南城人大中祥符進士流落銓調二十年嘗謂大

丈夫立世當自奮拔豈可碌碌出人門下通判廬州轉運使陳杲以威懾下吏有訟杲者朝廷遣曉鞠之人皆危曉謂屬部勢不可問曉治之以理略不爲意識者嘆服累官至職方員外郎

明一統志

危祐字夢弼南城人天禧進士知邵州使者按部有所求祐置笏曰某不敢擾民以固位請遂歸尋遷太學博士以言詆宰相謫守廉州吏進聚珠扇歎曰身爲廉州守而執此扇以對吏民獨不愧州名乎卻之

人物志

蔡充字公度南城人天聖進士家貧刻苦養母及仕未嘗廣田宅喪歸僦屋以居仕至羣牧判官司封員外郎

林志

過昱字彥明南城人寶元進士性至孝母沒刻木爲像

事之父一日大慟昱驚問故徐曰無他念吾事爾祖自

謂已盡禮今見兒事吾始覺猶未盡故感悔而悲耳及

父沒水漿不入口者七日孺慕終身

林志縣志過昱世居豐城

城定林故自稱定林老叟時邑中同為都官郎中者李

秉何延世與昱稱豐城三郎中通志及明一統志列過

昱於南城誤又臨川志有過勛為過源從孫別為一人

乃以昱之至孝通神集撫入臨川過勛傳亦誤又崇仁

縣志列過至孝不詳其名字事實而掘樂史仙鶴池記

文則墓并在樂子正前矣與諸志皆不合附識俟考

危固字堅道祐之子少好學以孝廉聞推先澤甘為庶

人作隱居詩以見志有數閨玉川屋七里子陵灘之句

薦除將作監主簿召試館職皆不就

林志

蔡冠卿字元輔充之子慶厯進士為原武簿遷下邳宰

鄆陵所至有惠愛遷大理少卿出知饒州前此范仲淹

嘗謫饒其去也人畫像祠之冠卿罷民亦畫像配范祠

焉人物志

李觀字泰伯建昌軍南城人穎悟過人五歲能調聲律習字書十歲通舉子業家貧竭力養親不慕榮利倡立盱江書院所學以推明聖經爲本不泥於漢唐諸儒之說獨不喜孟子嘗曰孔子尊王孟子乃勸諸侯叛王故作常語其間多毀孟子范仲淹守饒州得其文薦於朝以母老不願仕乞就除一官以便養並上其所業二十四篇不報皇祐二年仲淹又與余靖交章薦之乃授太學助教召爲說書明年又以海門縣主簿祿之胡瑗以疾罷命觀權同勾管太學以祖母未祔先塋請假歸遷葬尋卒門人自閩浙至著錄者十有餘人鄧溫伯最顯溫伯爲御史中丞上觀所著書且請官其子參魯朱子

嘗謂觀之學得於經爲多又言其禮論與已意合獨毀

孟子世或譏其偏云

椒邱集

鄧立字公儀南城人與李觀同學志合道一長於文辭事父母孝謹撫弟友愛服義疾惡意所不可雖親戚多引繩墨彈直斥絕浮屠說不使汙其門觀以畏友稱之

李泰伯集

謝思聖字心道南豐人孤貧力學事後母孝爲里醇儒慶厯登第調甯都主簿適鄰寇猖獗思聖食息城上爲守備計寇去轉掠石城思聖復攝令民賴以安

林志

曾叔卿建昌南豐人輩族兄也嘗買西江陶器欲貿易於北方旣而不果行有從之轉售者旣受直矣問將何之其人曰欲效君前策耳叔卿曰不可吾聞北方新有

災饑此物必不時泄故不以行余豈宜不告以誤子其人卽取錢去居鄉介潔非所宜受一介不取妻子困於饑寒而拊底孤惻惟恐失其意起家進士至著作佐郎

熙甯中卒

宋史

曾鞏字子固游太學歐陽修見其文而奇之自是名聞天下舉進士調太平州司法參軍召入編修史館書籍遷館閣校勘英宗實錄檢討通判越州厯知齊襄洪福明亳滄州進職直龍圖閣鞏爲治尙威嚴其徙滄州也過闕神宗召見勞問遂留判三班院鞏上疏議經費神宗頗嘉納之手詔中書曰五朝史事宜付曾鞏遂以爲史館修撰試中書舍人遭母憂卒年六十五平生嗜書家藏至二萬餘卷手自讐對雖白首不倦又集古今篆

刻爲金石錄五百餘卷有文集曰元豐類藁五十卷外
集十卷初與王安石友善安石稱其文辭以譬水之江
漢星之斗神宗嘗問鞏卿與王安石最密安石何如人
鞏曰安石文學行誼不減揚雄以吝故不及神宗遽曰
安石輕富貴不吝也鞏曰臣謂吝者安石勇於有爲而
吝於改過耳神宗領之呂公著常告神宗以鞏爲人行
義不如政事政事不如文章鞏以此不大用云東都事略
志舊案曾子固事績具見韓維所撰神道碑中央傳特
錄其議經費一疏得毋以此爲未竟其用乎據碑文所
著尚有續元豐類藁四十卷史傳亦失載又子固諡文
定宋史及行狀墓志俱不及續文獻通考諡法亦無之
惟見於陳宗禮所撰曾文昭家傳及虞伯生曾氏祠堂
記中賜諡歲月無考謹案臨川縣志國朝李紱有
會文定公居臨川考其言甚辨

鄧潤甫字溫伯建昌人皇祐進士爲上饒尉武昌令熙

甯中以王安石薦直舍人院知制誥擢御史中丞遷翰林學士因論奏相州獄爲蔡確所陷落職知撫州以龍圖閣直學士知成都召復學士一時制作獨倚潤甫焉哲宗立惟潤甫在院一夕草制二十有二修神宗實錄以母喪去終制以承旨召除禮部尙書紹聖初首開紹述遂拜尙書左丞章惇議重謫呂大防劉摯潤甫不以爲然曰俟見上當力爭無何暴卒諡安惠

宋史白志舊案鄧問甫

人物志

不載林志諱其開紹述事今據宋史謹案新城縣志稱潤甫新城人

曾誼字子常南城人皇祐進士博聞強記明於大體善屬文一時名出眾右爲吏平恕質慤務在愛人不爲刻察提舉江南東路常平同職欲增賦役民誼爭之不得自請罷去遂知楚州家故貧節廉自重罷吏歸常闔門

居不與人事

林志

許抗字損之南城人皇祐進士任沙縣時彭孫嘯聚亡命阻山爲固抗挺身入壘說降之移知郴州鑿湖千餘頃民賴其利官至福建轉運使

林志

李山甫字明叟南城人皇祐進士通判河州羌人犯城山甫與知州鮮于師中固守凡二十七日而圍解元豐初王韶薦其材可用授作坊使權發遣澧州召對論邊務神宗勉慰久之旣至蠻峒懾服山甫長於聽決而原於人情臨事敏捷所至有聲累官樞密副使

林志

曾肇字子開舉進士調黃巖簿稍遷國史院編修官進吏部郎中元祐初拜中書舍人實錄院修撰除給事中固辭請外以寶文閣待制知潁州徙應天府入爲吏部

侍郎論南郊旣去皇地祇位而議者欲夏至遣冢宰攝事則不復有親祭地祇之時於事天則躬行事地則遣官非王者父天母地之義又議明堂配帝請復設五帝與昊天上帝並祀徙刑部侍郎出知徐州紹聖初元祐士大夫皆流竄嶺表最後謫前史官范祖禹等以實錄譏訕爲罪肇以嘗與修降集賢院修撰知滁州徽宗卽位復爲中書舍人會日食故事當降詔求直言徽宗命肇草詔詔下投匭者日千百人元祐士大夫再以赦恩甄敘或復舊職典方面肇奏生者蒙恩矣死者未被聖澤也請如寇準曹利用故事檢會臣僚貶死未經敘復者還其所奪官職遷翰林學士兄布拜相以親嫌除龍圖閣學士提舉中太一宮元祐士大夫再被降黜肇請

與俱貶言者繼之遂落職謫知和州貶濮州團練副使

汀州安置移台州卒年六十二

東都事略 白志傳案 南宋陳宗禮所撰曾文

昭家傳歷事英神哲徽四朝踐更十二州歷吏戶禮刑四部侍郎兩爲中書舍人封曲阜開國侯贈少師諡文昭王僂曰鞏與肇以文章被近用爲時儒宗學者仰之布雖相蓋可貶云

呂南公字次儒建昌南城人於文不肯綴緝陳言熙甯

中士方推崇馬融王肅之業剽掠補拆臨摹之藝大行

南公一試禮闈不偶退築室灌園不復以進取爲意益

著書且借史筆以褒善貶惡遂以袞斧名所居齋嘗謂

士必不得已於言則文不可以不工蓋意有餘而文不

足則如吃人之辨訟心未始不虛理未始不直然而或

屈者無助於辭而已故毅然盡心思欲與古人並元祐

初立十科薦士中書舍人曾肇上疏稱其讀書爲文不

事俗學安貧守道志希古人堪充師表科一時廷臣亦多稱之欲命以官未及而卒遺文曰灌園先生集傳於

世

東都事略

王无咎字補之建昌南城人第進士爲天台令棄而從王安石學久之無以衣食其妻子復調南康主簿已又棄去好書力學寒暑行役不暫釋所在學者歸之王安石爲政无咎至京師士大夫多從之遊然與人寡合嘗閉門治書安石薦其文行該備守道安貧詔以爲國子

直講命未下而卒

東都事略

朱軾字器之南豐人嘗從曾鞏學性寬和輕財急義悉以祖業讓弟軫獨取故居曰此先人廬不可失也鄉民熊禧饒華負官逋欲自盡軾傾囊濟之得不死

人物志謹按

南豐縣志軾後以特奏名授房州司戶致仕五子京彥褒襄亮皆貴顯

傅野字亨南南城人任定海尉後徙居新城幼有志操

屹然慕古豪傑風王韶爲建昌司理薦於郡守爲軍學

教授韶受命取熙河奏爲熙學教授韶還朝論事卽言

野有文章學術而老願補東南一官上可之調明州定

海縣尉所爲文章號通藝二十四卷鄧潤甫爲之序

林

陳次公字仲父南城人安貧樂道隱居著書李觀嘗以

詩美之有之子出蒿萊行潔業且精之句觀臨終執次

公手以明堂圖制爲託云

林

朱京字世昌南豐人博學淹貫登進士甲科爲太學錄

神宗召見論事擢御史風神峻整見者憚之目爲眞御

史初臺臣奏事必先移閣門得班乃入京嘗以名聞翼

旦會有先之者不及對而退帝問京安在詔召之入爲留班以須未幾以論大臣謫監興國鹽稅歷江東轉運判官提點淮西刑獄元符初遷國子司業

宋史

朱彥軾子熙甯進士歷官刑部侍郎有小民曉出負販晝歸賊刃其母而逃遺刃在旁鄰伍執其子於官鍛鍊誣服獄已具彥疑其冤推辨得眞賊而出其子除中書

舍人

林志

朱襄彥之弟爲陳留尉縣直國門四方逃亡之藪襄有方略盜發必得一境肅清一日有中貴人館縣驛已而徵簿書若有所考按者襄曰畿邑刺舉監司職也朝廷未聞遣使此必詐也爲圖奸利耳送獄鞫之果然仕至

知韶州

林志

符行中南豐人父授元豐進士累官中奉大夫贈南豐
開國男行中政和進士爲温州通判知成都府所至有
政績任江西轉運使奏減月俸虛額五分識虞允文於
常僚中後以言奪職安置南雍州所著猥藁四十卷林
童蒙字敏求南城人未第時居城北鄉外曰塔步家貧
聚小兒學以自給壯年偉貌鄰室處女素慕之一夕排
闥來奔蒙力拒之女嘆惋退蒙不復居其地託故徙焉
後登政和進士第官至承議郎知蘄州

人物志

范柔中字元翼南城人舉進士官至宣德郎太學博士
其學長於春秋著春秋見微十卷行於世折衷三傳去
取諸家深得聖人之意元祐閒上書言事後被禁錮遷
謫死紹興初朝廷崇尚節義追贈直秘書閣得官一子

人物志

曾紆字公卷布子善詞翰有志節以蔭補官歷州縣坐忤時貶零陵與黃庭堅厚善紹興二年除直顯謨閣守本郡別號空青有文集十卷山陰陸游爲常平使者至臨川得其遺文嘆舉世士大夫知空青不盡云

林志謝志舊

案曾紆林志訛入撫州人物志所載事蹟與林志全不合白志入建昌

曾忘

一作

字仲常鞏之孫補太學內舍生以父任郊社

齋郎累官司農丞通判温州須次於越金人陷越以琵琶爲帥約詰旦城中文武官並詣府有不至及藏匿不覺察者皆死忘獨不往爲鄰人糾察逮捕辭氣不屈時金人帳中執兵者皆愕眙相視琵琶曰且令出左右盡驅其家屬四十口同日殺之越南門外越人作窖瘞其

尸金人去忘弟朝散郎晁時知杭州餘杭縣事製大棺

斂其骨葬之天柱山

東都事略

曾悟字蒙伯肇之孫宣和進士靖康間為亳州士曹金

人破毫悟被執嫚罵眾環刃刺之妻孥亦同日被害

林志

謝志舊案曾悟林志作撫州人白志改正

李涓字浩然南豐人仕為鄂州崇陽令靖康之難募兵

勤王至蔡州與金人戰死之

林志

邱稅字為高南豐人補入太學時方宗王民新經稅惟

尚理義故不偶建炎閒上書請都金陵以圖恢復嗜古

好文變時之心散見篇翰著有議古集寓文類詩解義

林志

蔡延世字永叔南城人建炎中以文武全才舉為建昌

兵馬監押金人猝至守倅皆遁延世櫻城固守遂領軍
事嘗倅當塗及濠梁所至有聲

林志

吳伸南城人與弟倫俱太學生立社倉以周貧乏朱子
記略云紹興甲寅之歲發私穀四千斛以應詔旨民有
所仰食無復死徙之虞咸德於吳而伸與倫不敢當曰
是倉之立君師之教祖考之澤而鄉鄰之功也

人物志

曾造南豐人性和易而操持確不可移竊與中知乳源
謂養士先於教於是籍官田及民廢業數百畝爲學產
創黌宮立職長嚴課試士風翕然丕變尋調知樂昌遷
學於城東訓士亦如在乳源時於是樂昌文教方軌中

州矣

廣東通志

張大經字彥文南城人紹興進士宰龍泉儀真俱有善

政孝宗召拜御史嘗論中人不宣薦士以傷士風秋旱
詔求言大經極言民力竭而愁嘆多軍士貧而怨嗟眾
願疏出儉腐抑絕倖門除禮部尙書出知建甯府移鎮
紹興辭不拜主眷未衰抗疏引去人方之孔戣壽踰八

十諡簡肅

白志

劉號瑞南城人紹興進士學問優贍政事老成爲時所
重官至刑部侍郎龍圖閣學士

林志

曾炎字南仲肇之曾孫隆興進士嘗親捕劇盜數十人
貽書理官謂兵革甫定宜有縱舍犯者多得末減累官
通奉大夫封曲阜開國子

林志

游少游字希卿南豐人隆興進士攝永興縣令郡吏督
賦語侵少游少游叱曰剝民之政吾不忍爲命杖之又

取宗室武斷者繩以法豪猾斂迹遷廬陵縣判南安軍

官至朝列大夫

林志

傅夢泉字子淵南城人乾道進士嘗遊朱子陸九淵張
栻之門朱子稱其氣質剛毅極不易得九淵讀與周必
大論道書曰子淵擒龍打鳳手又曰義利之辨子淵之
對可謂切要二賢所許如此講學於鄉席嘗滿朱子謂
其得朋進業之盛深慰鄙懷爲澧州衡州博士立石鼓
書院宰甯都厯清江通守皆以善政聞著有石鼓文集

縣志

何坦字少平廣昌人淳熙進士厯靖州江陵府教授知
將樂縣擢知連州所至以善治聞累遷寶謨閣學士廣
東提刑廉平爲嶺南之冠卒謚文定所著西疇常言見

百川學海

人物志

陳宗禮字立之南豐人少貧力學淳熙中舉進士累官參知政事以直言清節著卒贈盱江郡公諡文定

林志

鄧約禮字文範南城人從陸九淵學嘗爲江州德化丞兩攝邑葺理凋弊得民心季浩以子妻之遂家臨川由進士官至常德府推官以子貴累贈中大夫

人物志

聶子述字善之南城人紹熙進士官至吏部侍郎以制置使出帥西蜀已而致政歸適有盜殺郡守朝廷遣將欲屠城子述單騎至麾下力陳民冤乃止殺其渠魁卒諡文正追封衛國公

人物志

曾漸字鴻甫南城人紹熙進士官至工部侍郎立朝有

風節卒贈少師諡文莊

林志

何行字自強廣昌人父聖能官至紹興知府多善政行其長子博通經史善屬文以明經舉知武平縣地接贛廣多劇盜行因舊城築之民賴以安丁父憂服除見宋境日蹙無復仕進意以文籍自娛有文集藏於家

人物志

饒廷直字朝弼南城人由進士官鄧州通判攝州事值宋金講和割唐鄧二州屬金金迫而取之以未得命堅守以待勢日危急廷直以手染血印表上遂自刎嘗作鑑論百篇包恢序而刻之

人物志

包恢字宏父建昌人自世父約叔父遜從朱熹陸九淵學恢少爲諸父門人講大學其言高明諸父驚焉嘉定進士邵武守王遂辟爲光澤主簿平寇亂建甯守袁甫薦爲府學教授監虎翼軍募土豪討唐石之寇改沿海

制置司幹官會歲饑盜起金壇溧陽之閒恢部諸將誅
平之改知永豐縣添差通判台州徐鹿卿討溫寇辟兼
提點刑獄司主管文字改通判臨安府遷知台州有妖
僧居山中號活佛男女爭事之因爲姦利豪貴風靡恢
誅其僧移知建甯尋知隆興府兼江西轉運沈妖妓於
水化爲狐人皆神之有母愬子者年月後狀作疏字恢
疑之呼其子至泣不言及得其情母孀居與僧通惡其
子諫以不孝坐之狀則僧爲之也因責子侍養跬步不
離僧無由至母乃託夫諱日入寺作佛事以籠盛衣帛
因納僧於內以歸恢知之使人要之置籠公庫逾旬吏
報籠中臭達於外恢命沈於江景定初權禮部侍郎尋
爲中書舍人林希逸奏恢守法奉公其心如水知平江

府召爲刑部尙書僉書樞密院事封南城縣侯郊祀禮成以資政殿學士致仕年八十有七臨終舉盧懷慎臥簣窮約事戒諸子斂以深衣作書別親戚而後卒有光隕其地贈少保謚文肅

宋史

李象字材叔南城人躬行孝弟居山中於諸經無所不說而尤用意於詩易著詩孟子講義易統論

林志

曾穎茂字仲實漸之子官至吏部侍郎理家莅政慎密嚴重凡臺閣典故官曹科條邦計本末洞究綱紀繩引珠貫密施顯設刃游縷解有所操執不回不撓封武城

侯

林志

黃晟字子成南豐人明經考古得諸儒言以沈涵細訂陸九淵稱之曰粹然其容懇然其中其施不潰其守不

渝推父蔭以與兩弟惟季弟無可及則推己田與之結

廬仙巖之旁扁曰壺隱

府志

童宗說字夢弼南城人爲袁州教授有柳文音註行於

世極其審博稱善本

林志

陳堯舉字綱伯南豐人舉進士嘗承江西運司檄考試

廬陵士子拔文天祥人謂其知人居官甘淡泊無一毫

妄取學者尊爲鳳岡先生官至通判臨江軍

林志

諶祐字自求南豐人古貌古心耿介寡諧蕭然萬山中

窮經博古文宗左氏班馬詩宗杜黃每一篇出江湖傳

誦而律體更精

林志

劉挾字信翁南豐人侍郎張淵微薦爲國史院校勘時

七十餘矣旣入館分校列傳未上而卒

林志

黃載字伯厚南豐人世習儒明左氏春秋貫穿百家晚年用平寇功補官鄭丞相清之力引之知封州以廉謹

稱林

黃樞字機先南豐人慶元進士爲南雄司法峒寇猖獗郡檄樞督餉且調度破之賊率眾數萬空巢而出官軍不滿千遂死之初樞問途著隻轡語其下曰以此爲識已而賊退求尸得轡以證事聞贈通直郎

林

李萬字必大南豐人嘉定進士嘗典某郡獄兵變將盡縱囚萬冠裳坐廳事置公牘於前曰吾受命主獄囚者得罪於國法奴輩安得縱舍旣而郡倖與萬同出撫定亂得息秩滿調贛縣丞有兵事萬堅執不阿事平上官

壯之

林

趙崇侯字信之南豐人嘉定進士爲福建運司主管文
字臺有疑獄崇侯得其情未幾權南劍州事以清介名

林志

鄧均一名炯建昌人嘉定進士政事寬平所至以鄧佛
稱之歷官吏部侍郎卒諡清惠

林志

趙崇嶠字漢宗南豐人嘉定進士爲石城令時寇賊橫
虐崇嶠以恩信結將士討除元惡改知淳安縣上疏極
論儲嗣未定及中人專橫官至朝散大夫有白雲藁

林志

謝升孫南城人舉進士官翰林編修以文章名世人稱

南窗先生有詩義法行世

林志

孫瑞字履祥南豐人端平進士有學行事母以孝稱受
學於眞德秀深明義理歷任肇慶司理勃源令爲政清

簡民便安之

林志

張淵微新城人登淳祐進士第一人累官侍郎以直節

著

人物志

曾淵字廣微南豐人淳祐進士國事急賈似道得罪陳
宜中當國淵遁歸里被劾竄雷州景炎起參知政事走

南安而卒

林志
詳案謝志撫州列傳有曾淵子建昌
有曾淵事蹟相同南豐縣志以爲重出蓋治

林志
之誤

趙與植字德茂南豐人淳祐進士幼敏悟工文章嘗知

醴陵縣嚴州兵變往爲知州單車入境平亂擢知臨安

府

林志

蕭雷龍字顯辰新城人景定進士調臨安府學教授通
判衢州權知府事北兵薄城下不降脫還建昌與同里

人黃巡檢起兵時元兵四合雷龍度不可支與黃巡檢及麾下數人奔入閩未出境爲同安武人徐浚沖獲送縣權縣尹劉聖仲素與雷龍有怨殺之後聖仲北來泊舟小孤山有巨艦衝前建大旂書曰蕭知府兵繼見雷龍坐船上聖仲大呼有頃不見以驚死

宋史

吳楚材名炎以字行南城人德祐元年建昌降明年春楚材還鄉糾集民兵旣失利且乏援元兵誘降其眾多解去楚材走光澤爲人所執及其子應登以獻郡遣錄事婁南良訊之曰汝何錯舉楚材抗聲曰不錯不錯如府錄所爲乃大錯耳吾一鄙儒特爲忠義所激爲國出力事雖不成正不錯也南良愧而語塞吳浚爲江西制置招討使斬楚材父子傳首諸邑益王立於福州聞而

哀之贈官朝奉郎邵武境上立廟賜名忠勇

林志

何洲聖能次子志行醇篤文章高古以捧西疇遺表恩授副尉政寬守潔恬於進取樞密陳文定少與洲善且連嫻好及文定貴顯浮沈小邑未一往于宋末退休御

史程鉅夫求賢江西勸洲再仕以疾力辭

人物志

瞿元肅南豐人四世同居百五十餘口父母均慈子孫盡孝兄弟友愛婦女勤事父歿兄弟六人廬墓盡哀有司聞於朝旌表召元肅入見賜御書復其家

林志

謝元禮南城人通五經尤長於易以德行文學稱元程

鉅夫志其墓

林志

黃叔美字河清南城人隱居盱南山中爲詩慷慨磊落不凝滯於物有集元揭傒斯序之兄叔敬亦以文學知

名林

黃繼善字成性南城人著史學提要以四言韻語編貫

諸史始上古終宋條理井井甯都魏禧自廣陵攜入江

西見者驚嘆以爲祕本舊有程元海序今不傳

魏叔子集謝

志舊案繼善萬志府縣志皆不載其家世行事無可考

魏禧曰明人之書亡於江西傳於廣陵數百年後卒以江西人得之信乎書之傳有數也

廖應淮字學海南城人自號溟滓生抱負奇氣年三十

遊杭上疏言丁大全亂政狀中以法配漢陽軍應淮荷

校行歌出都見者壯之遇蜀人杜可久爲禱營將脫其

戍籍授以邵子先天易數其算由先天起數應淮神警

一問輒了嘗坐臨安樓市大街卜卜已輒閉樓危坐取

一環按劍自鍛之當火少休則危坐以爲常曾過曾淵

子家索酒飲酣抵掌放歌見賈似道直言宋鼎將移語畢亦徑出國子監簿吳浚以先天易箋陰符經六花陳法欲上之應淮擲其藁於地曰誣天下國家者此書也浚欲從之受易罵曰若黃口兒語此人皆邵子矣後以其數學授進士彭復之以傳鄱陽傅立著有元元集厯髓星野指南象滋說會補畫前妙旨約十萬言

宋史謝志舊

案應淮雖號精數學而氣節奇偉前志重見方伎今據宋史補正

張日中南城人景炎六年文天祥帥師次汀州日中以兵來會天祥師潰於空坑日中奮力拒戰身被數十槍而死

林志謹案臨川縣志張恒傳稱日中爲橫渠六世孫

鄧茂生字秀實南城人明經博史以至諸子百家之書陰陽術數之學無不研精至理學者宗之一時記述金

石之文多出其手人稱秀實先生

林志

傅汝舟字曉窗南城人博學工詩欲紹先世令名乃立義試詩會聘鄧茂生師之日與四方名士更相倡和一

時作者雲集

林志

聶銖字積

一作稜

道南城人隱居不求聞達或勸其出答

曰吾讀祖父之書樂堯舜之道平生願足矣鉅公聞人多就見焉

林志

李澍字宗海觀之後登進士不仕元初臺臣舉故官澍

與謝枋得固辭不就時稱其忠隱於龍馬峯捐金購書

研精考訂以繼先代之緒

人物志案李澍

林志謝志舊入元

元

程文海字鉅夫南城人避武宗諱以字行宋德祐元年

從叔父飛卿官於洪講學東湖之上及飛卿降元鉅夫入爲質子授宣武將軍管軍千戶他日召見問賈似道何如人鉅夫條對甚悉帝說給札令書以進乃除應奉翰林文字尋進修撰累遷集賢直學士兼祕書少監至元十九年奏陳五事朝廷多采行之加翰林集賢學士同領會同館事擢侍御史行御史臺事南人入臺自鉅夫始時上思治求賢如渴命鉅夫前往江南諸道訪求賢俊於是萬一鶚余恁趙孟頫等用焉時僧格專權鉅夫入朝發其奸僧格大怒請殺之上不許大德四年自閩海道肅政廉訪使遷江南湖北道滿秩還家上思用舊臣召拜翰林學士知制誥同修國史商議中書省事至大元年與修成宗實錄有旨命往湖廣定選訖事以

病假歸武宗賓天仁宗居諒闇首召老臣十六人造朝
鉅夫與焉特加榮祿大夫仍故職賜卹德之碑延祐三
年得告南還命廷臣祖餞以榮之薨年七十所著文集

五十卷

元史本傳 何太虛集 謝志
舊案鉅夫卦楚國公諡文憲

劉壘字起潛南豐人薦本州儒學教授性聰敏好書博
覽古今宋末與同里譙祐以詩文鳴年三十七而宋亡
又十八年當路薦署郡學正年七十受朝命教授延平
卒年七十八所著有經說講義水雲邨藁英華錄隱居
通議凡百二十五卷

人物志

劉麟瑞號如邨壘子至治中追維宋末仗義死事之士
討據遺逸賦五十律題曰昭忠詠邑人趙景良合水邨
十忠詩爲一卷附以汪水雲方虛谷等傷時之什總名

之曰忠義集

元詩小序

胡夢魁字景明新城人未冠以明經貢於鄉登進士第累遷浙江制置司參議官元初奉母歸里江西宣慰使檄攝本郡判官者二年以薦擢僉廣西憲事嶺海吏治不律所至蕩滌之居四年民爲建祠以病歸所爲詩文

曰偶然集

程雪樓集

揭祐民廣昌人泰定中官邵武府經歷京師公卿多樂與遊程鉅夫尤敬禮焉寓居盱水上自號盱里子族子侯斯爲作傳稱其騰擲宇宙凌轢古今有盱里子集

揭文

安集

江學庭南城人才優學博後進仰之若山岳仕至國子

祭酒贈莒國公諡文正

林志

吳德新字止善建昌人工醫留京師久之嘗往甯夏會盜至德新見執脅使降誓不從賊乃縛其兩手加白刃頸上迫其畏屈德新罵不已乃曳之井上陽欲擠之德新偶得寬卽自投井中仰罵賊賊射矢貫其頂罵益力賊怒以長槍刺之然亦壯其志曰此眞丈夫也以土埋井而去

元史

余冕字服周南城人由吏員官至柳州衛經歷懷遠久爲猺賊所殘冕與知縣馬希武撫安猺民督工築城奸民以爲不利勾猺復叛有先來言者冕曰爲國捐軀奚恤一死猺數千攻圍刃職官六人冕同希武奮不顧命與賊對敵徧身中矢猶罵賊不屈竟被碎屍

人物志

夏顯卿臨川人避地南城以才力爲王溥所知時各路

軍州洵洵不知所屬顯卿勸溥當受福建平章楊珠布

哈

原作燕
只不花

調度爲溥糾練義旅示以順逆賊至輒擒滅

境內以安溥承制署顯卿總管府參謀至正戊戌陳友

諒兵圍建昌顯卿率眾入城與陳兵三接戰殺傷相當

後城守日急謀走閩求援溥未決陳將誘溥持友諒僞

平章敕命授之仍授參謀顯卿乃對眾聲義諫阻溥怒

遂殺之

人物志

戴良南城人順帝時臨川賊鄧忠陷建昌路良起義兵

復之

林志

劉時習字說道南城人負德器爲文章如菽粟布帛皆

有資於民用知施容州時郡國多故時習宣之以能推

之以忠所施各適其宜致仕歸鄉卒

林志

朱倬字孟章新城人登至正壬午第官遂安縣尹壬辰

秋寇由開化趨遂安吏卒逃散倬坐公所以待盡寇焚

廨舍乃赴水死新安文獻志謝志舊案朱倬志書俱不載今采明初獻人汪仲魯叙所撰朱

孟章哀辭補入

萬清字仕廉南城人由進士官至樞密院使至正辛丑

四海不甯棄任還家仍命鎮守建昌路總管府明洪武

初竄入閩地屢徵不就使人求得之貶和州知州不就

卒人物志

黃覺經南城人五歲因亂失母稍長誓天事佛發願求

母所在乃渡江涉淮行乞而往衝風冒雨三十八年備

歷艱苦至汝州梁縣得其母以歸有司請旌其門閭元史

翁漢傑新城人年三十方讀書四十成大儒明詩經閉

戶卻客吟詠自適後徵爲富州學正

林志

涂建可新城人與席梅可潘東臯李南浦爲黎川四友

至正末杜門避世開畦種菊自號菊隱

林志

揭繼可字汝善廣昌人學問以體用爲大本以踐履爲

實功子弟有過每涕泣而道之

林志

彭仕淵新城人仗義有爲至正間紅巾陷邑仕淵與從

子仲斌集義兵爲保障民賴以安

林志

李宗可廣昌人有勇略善禦余闕爲淮南行省左丞延

至幕以兄女妻之擢池州判官權義兵萬戶統新軍守

水砦屢有戰功賊旣破城宗可橫槊入賊中殺死甚眾

聞闕死馳還家聚妻孥謂曰元帥死國吾義不屈汝等

毋不死爲人所辱拔劍無大小盡殺之出據胡牀坐飲

數巨觥自刎葬余闕墓側

宋濂撰余左丞傳謝志舊案潛溪稱宗可爲蘇人實籍

廣昌其子孫見爲廣昌人

明

吳毅字尙志南城人性敏學贍學者稱學海先生洪武初徵拜博士與修大明律令致仕歸教授鄉里爲文古雅不事雕琢有學海集

林志

朱大中新城人博學能文杜門不出專務聖賢之學洪武初爲國子助教侍讀多所裨益後致仕歸仍給俸尋復徵聘而大中已歿賜祭葬官其子

安志

程新字文炳新城人洪武中鄉舉知雙流縣清慎練達興禮讓革奸弊勸農桑毀淫祠政化大行累官兵部侍

郎

安志

魏卓廣昌人洪武進士官監察御史巡按河南畿輔內戚某橫甚立置之法質明詣闕陳狀上賜之酒曰御酒同卿飲鋒刀不肯饒意卓乞哀也卓應聲云甯爲忠諫死不怕帝心焦忤旨命金吾引出戮之已而上深悔賜葬復官

縣志 謹案卓事與明史茹太素傳同或有所影附歟

江仲海字會龍新城人洪武初以宋濂詹同等薦聘至京試天馬賦授禮部主事歷官侍郎爲文有古致所著有光岳鍾靈集夢筆山房文類

安志

翁顯德新城人徐壽輝陷江右乃召募鄉兵屢與賊戰敗走之洪武二年任廣東右衛山寇房文廣爲亂顯德

以前鋒力戰死詔贈官蔭子儀

安志

黃肅字子邕新城人元季官禮部主事洪武中入朝升

侍郎晉工部尙書有醉夢集王子充云子邕詩簡高平

質一本漢魏絕去近代聲律之習

明詩綜小序

徐諒字子直南城人洪武初本學訓導貧而好學爲詩宗杜少陵諸生翕從以其爲徐孺子後稱曰南州先生

林志

張士達南城人博學善記長於文章洪武初赴闕上萬言書出使西域其爲文氣骨雄偉見者奇之

人物志

何澄字源清新城人洪武中鄉舉領教職佐縣政咸有

成績擢禮科給事直宏文館引年致仕

林志

王增字仲益洪武末官御史剛毅亮直嘗居母憂鄰火

將及增具斬服望拜欲赴火死須臾反風母柩獲全

林志

劉紹字子憲以字行新城人洪武中官翰林應奉文字

與盱江胡布張達同時有詩名郡人張烈光啟編其詩

入元音遺響明詩綜小序

盧秉安字文定南豐人洪武間知東莞歲侵緩催科曰

上官罪後期吾自當之不忍迫吾民也有訟於庭者諭

以理咸自悔囹圄常空居十九年調東阿士民流涕廣東

志通

李誠字子高南城人洪武初搜求賢俊有司以誠貢於

京銓衡試以經義詩論咸置第一授中江縣丞招集流

散降服野人後官河南益以廉勤爲政增戶一千六百

有奇開荒田三百餘頃建三賢祠修復鳴皋洛西書院

志林

朱紘字梯雲南豐人建文中進士官翰林院編修居家

孝友爲人端謹所著有仕優藁

林志

何文淵字巨川廣昌人永樂進士授御史歷按山東四
川烏蒙奸民什伽私土知府祿昭妻懼誅誣昭反詔發
軍討文淵檄止所調軍而白其誣宣德五年用顧佐薦
知温州居六年治最增俸以胡濙薦擢刑部右侍郎正
統初朝議征麓川文淵疏諫帝下其議廷臣多主用兵
於是西南騷動僅乃克之而失亡多其冬乞歸景帝卽
位起吏部侍郎尋進尙書加太子太保災異見給事中
林聰等劾之命致仕所著有東園集

明史何喬新傳
列卿錄

江文海字會龍南城人廣學多覽著博約考一書自歷
代制度古今治政人物賢否靡不具載官至禮部侍郎

白志

謹案江文海與仲海同時
同郡同姓同字同官亦一奇也

揭稽廣昌人永樂進士居臺官正色立朝介然有守海
南天妃廟靈應使者過必祭焉稽渡此惟投一詩有若
載苞苴並土物任教沈在此滄溟之句仕至兵部侍郎

分省人物考

李永年南城人永樂進士爲庶吉士遷吏部員外才能
茂著歷山東參政在官四十餘年偉績在人耳目

林志

鄭誠字文實南城人永樂中以國子生擢吏部司務歷
文選郎中宣德初超拜本部侍郎卒楊士奇作墓志

林志

程輅字伯衡新城人精於書禮尤長篆隸溫柔篤厚言
動不苟以古道自居自號東皋處士

人物志

饒晞南城人由監生營建北京練歷幹濟事多克集命
署大司馬事得大臣體遷廣西參議自始至終以廉慎

持已卒之夕衣衾僅足爲斂

人物志

丁琳字文善南城人由監生官至福建僉事黜奸貪疏冤抑恩威並著羣吏鼠伏平生耿介卒之日囊無十金之積

人物志

趙禮南豐人永樂進士嘗校兩浙士極稱姚夔旣而夔魁南省旋魁天下其明於知人若此厯官提學副使

明一

統志

程南雲南城人永樂中以能書徵與修大典授中書舍人尤精篆隸累官太常卿

林志

甘霖字時雨南豐人永樂進士爲御史執法不阿與李

立齊名

林志

李立南豐人永樂進士爲御史發奸擿伏風紀肅然上

目爲小李而不名仕終副使

林志

賴巽字遜志廣昌人永樂進士爲監察御史廉正有威官吏敬憚嘗出使廣東占城使臣私相語曰此御史嚴

肅威斷而不可犯累官按察使

明一統志

賴瑛字世傑廣昌人永樂進士爲監察御史剛明直亮遇事敢言激揚善惡尤愜輿情憲度肅清獄無冤滯累

官至參政

明一統志

張文質字仲甫南城人寒素時嘗於郭東旅肆獲一囊頗重意人遺金守候抵暮竟無人至歸而啟視果白金五百兩翼日仍至故處候之有老叟逐一少年散髮血額倉皇入肆詰之則遺金者之父疑子妄費欲垂死質驗金數相符悉還之其父子欲中分文質曰吾利苟得

不於此候爾矣子昇成化己丑狀元

人物志

饒禮字景節南城人永樂中以國子生授御史累升河

南布政使爲政寬恕所至咸愛戴之

林志

鄧棨字孟擴南城人永樂進士授御史巡按蘇松期滿將代父老赴闕乞留宣德十年陝西按察使闕詔廷臣舉清愼有威望者楊士奇以棨薦遂以命之正統十八年爲右副都御史扈從北征及遇變同行者曰吾輩可自脫去棨曰鑒輿失所我尙安歸主辱臣死分也遂死贈右都御史諡襄敏官其子瑞大理評事

明史王佐傳

俞泰南城人正統中由監生爲御史激濁揚清有聲於時風紀肅然豪猾不敢肆處已待人斷獄應事皆敬愼

詳密官至廣西僉事

明一統志

饒秉鑑字憲章廣昌舉人祖文遠徵才猷不就父希明
充糧長至京太祖召對稱旨賜銀五十兩居父喪悉遵
家禮秉鑑初貳肇慶聽訟理財皆公明擢守廉州時盜
賊爲梗秉鑑前後擒獲三千有奇廉民安堵都御史葉
盛旌爲十郡之最事聞憲廟賜綵緞銀幣甚厚益感激
疏諸大將玩盜剝民罪中忌罷歸著有春秋提要

謝志

何喬新字廷秀廣昌人景泰進士南京禮部主事歷升
福建副使禽礦盜捕亂民免興化牛租清流歸化里恃
險不供賦白都御史置歸化縣民始奉要束遷河南按
察使招山谷流民歸籍者六萬餘戶進湖廣右布政使
擢右副都御史巡撫山西召拜刑部右侍郎孝宗嗣位
萬安劉吉等忌喬新剛正出爲南京刑部尙書用王恕

薦始召還御史鄒魯誣喬新受賕乃拜疏乞歸喬新博
綜羣籍聞異書輒借鈔積三萬餘帙皆手校讎著述甚
富與人寡合氣節友彭韶學問友邱濬而已罷歸後中
外多論薦竟不復起家居十五年卒贈太子太保謚文
肅所著有宋元史臆見周禮集註策府羣玉續編勲賢
琬炎集及椒邱集五世孫濤白志作源與弟沆同舉嘉靖己
酉鄉試濤第一授安慶府推官到官三日吏白當伏謁
監司濤輦蹙曰非我所能卽棄官去源自有傳明史列卿錄
左贊字時相南城人天順進士歷任吏部郎中豪邁不
羈至其爲文謹繩尺崇理致讀之溫然可愛尤精於隸
書爲憲宗所稱初學於姚夔又受知於李賢二人秉鈞
或謂且大用然贊內和外剛議論是非不肯少假借以

是爲當道所忌官至布政使卒

林志

張昇字啟昭南城人成化己丑進士第一歷諭德遷庶子大學士劉吉當國昇因天變疏言陛下卽位言者率以萬安劉吉尹直爲言安直被斥吉獨存乃傾身阿佞取悅言官昏暮款門祈免糾劾許以超遷由是諫官緘口奸計始遂貴戚萬喜依憑宮壺凶燄熾張吉與締姻及喜下獄猶爲營捄父存則異居各爨父歿則奪情起官且歷數其納賄縱子等十罪吉憤甚風科道劾昇誣詆調南京工部員外郎吉罷復故官歷禮部左右侍郎代傅瀚爲尙書孝宗崩真人陳應禎西番灌頂大國師那卜堅參等以被除率其徒入乾清宮昇請寘之法詔奪其名號逐之昇在部五年遇災異輒進直言亦數爲

言者所攻正德初忤劉瑾謝病詔加太子太保乘傳歸

明史 白志舊案昇
贈太子太傅諡文僖

夏雲字時望南城人官教諭操履準古嘗膺聘爲考校
官有士懷千金鬻舉者暮夜抵舍閉門拒之又有人以當
道故人書至者竟不啟視然終身不發人姓名亦未嘗
對人言也

人物志

黎崇字好禮南城人居父喪哀毀踰禮及葬結廬墓側
三年不櫛沐免喪猶縞衣糲食與同邑潘烈新城余永
壽皆以孝行重於鄉國

林志

江澂字景吳南城人成化進士歷知黟建平甯海三縣
所至廉潔有聲能以三代井田經界爲重奏行親爲履
畝定賦湮圯者悉罷其征且致麥秀兩岐之瑞升松江

同知改淮安擢四川僉事清理屯田鹽法公私皆便三

年乞致仕

明一統志

夏泉字時清南城人成化鄉舉任蘇州通判平海寇有功著有平海錄嘗奔宜陽扶兄柩歸次泗山舟漏漂沒且盡泉慟哭柩回流不去呼他舟舉之

林志

何屋字朝舉新城人由進士爲行人司使遼府惠王再碁欲舉祭於墓屋毅然正之以禮改主事督饗眞州率民掩所暴骸疏商舟之滯屋有古琴逆瑾欲得之不與出知程番平生義利甚嚴兄仲同居疏食敝廬晏如也官三十年而家貧所著有易經諸解

人物志

吳駒字彥驤南豐人天性孝友讀書通大義工詩文侍親左右飲膳必躬親之昏定然後復寢父潮宗以茂才

授政和令改海陽歸里人孫佳給力其家里胥彭文杰誘而縛之潮宗覺率諸子拒之門毆文杰致死法坐潮宗駒曰吾父老矣吾弟幼且無後自詣理曰死文杰者彥驤也令難之駒曰以子代父何不可乎況殺人者實彥驤也非吾父與弟也令憫而代之孝子曰侍父獄中朝夕起居猶荷校而立父旣出獄居二載會有詔讞疑獄駒在行中至淮安病卒年且六十一歲矣

羅一
集

羅玘字景鳴南城人博學好古文務爲奇奧年四十困諸生輸粟入國學邱濬爲祭酒試以文大驚成化末領京闈鄉試第一明年舉進士選庶吉士授編修益肆力古文尤尙節義臺諫救劉遜盡下獄玘言當優容以全國體中官李廣死遺一籍具識大臣賄交者帝怒命言

官指名劾奏玘上言曰大臣表正百僚今若此固宜寘重典然言官未見籍記憑臆而論安辨玉石一經攻摘且玷終身臣請降敕密諭使引疾退或斥以他事庶不爲朝廷羞而仕路亦清秩滿進侍讀正德初遷南京太常少卿劉瑾亂政李東陽依違其閒玘東陽所舉士也貽書責以大義且請削門生之籍尋進本寺卿擢南京吏部右侍郎遇事嚴謹僚屬畏憚畿輔盜縱橫而皇儲未建疏論激切且侵執政考績赴都遂引疾致仕歸甯王宸濠慕其名遣使餽玘避之深山及叛玘已病馳書守臣約討賊事未舉而卒嘉靖初賜諡文肅學者稱圭峯先生

明史 謹案列卿錄贈禮部尚書

廖永綏廣昌人性友愛五世同堂婦人入門無敢言分

爨者衣製無專有隨便長短服之羅玘高其誼言於有

司旌其門曰雍睦

林志

夏良勝字于中南城人正德二年舉鄉試第一明年成進士授刑部主事調吏部進考功員外郎南巡詔下具疏與禮部萬潮太常博士陳九川連署以進極言禍患且至時舒芬黃鞏陸震疏已前入吏部郎中張衍瑞等十四人刑部郎中陸倕等五十三人繼之禮部郎中姜龍等十六人兵部郎中孫鳳等十六人又繼之而醫士徐鏊亦以其術諫諸疏既入帝與諸倖臣皆大怒遂下良勝潮九川鞏震鏊詔獄芬及衍瑞等百有七人跪午門外五日加桎梏焉至晚仍繫獄諸臣晨入暮出索索若重囚道途觀者無不歎息泣下而廷臣自大學士楊

廷和尚書石玠疏救外莫有言者芬等百有七人跪既畢杖各三十謫倡首者於外餘奪俸半歲杖良勝等六人及余廷瓚周敘林大輅各五十良勝震鞏潮九川除名他貶黜有差鰲戍邊而車駕亦不復出矣良勝既歸講授生徒世宗立召復故官大禮議起數偕僚長力爭及席書張璫桂萼方獻夫用中旨超擢又執不可由是爲議禮者所切齒以久次遷南京太常少卿未赴謫茶陵知州明倫大典成詔責前郎中良勝脅持庶官釀禍特深黜爲民謫戍遼東三萬衛踰五年卒於戍所穆宗

立贈太常卿

明史

鄧汝相字仲弼南豐人嘉靖舉人授祁陽知縣多善政報最升雲南賓州知州未幾謝病歸居家二十餘年年

八十著有南溪集

府志

程燦字文純南城人由舉人尹鹽城上元嘗三人覲乘一馬以一馬負冊書一隸馭之而已擢守鎮遠結四十年未決之案以還侵地請三十年未支之糧以蘇貧軍所去必有遺頌歷任四十年貧約僅同寒士官至苑馬

少卿

人物志

李柱南豐人自邑城徙居紫雲橋積書數千卷以教子

弟鄉人稱質邨先生以子萬實貴贈按察司僉事

楊載鳴集

李萬實字少虛南豐人嘉靖進士授行人司擢刑科給

事中疏論權璫改南垣爲廣東僉事移浙江憲使乞歸家居二十餘年講明良知之學所著有崇質堂集二十

卷其奏疏名恬仕錄

人物志

李泰字塞齋新城人由進士仕至員外郎精於易學雖燕居動止不苟官主事時督通倉官車負逋連繫死者什五泰會同所司疏其繫居呂梁砌隄岸千百丈時宦倖李廣督宮役同官屈膝泰獨長揖里居周恤貧乏有

范文正之風

謝志原案李泰前志誤入宋今改正

羅鈇字明衛南城人南京工部營繕所所正父增被族人經獄連逮繫獄成鈇七上書以非例格不行再詣闕泣不絕聲都御史汪鉉憫之爲代奏乃出增計事始終凡三十六年備嘗艱苦同邑楊諫亦以孝著

安志

黃連廣昌人爲賀縣令舊例慶賀皆千戶行禮連改縣行之造儀仗開三乘寺爲習儀所建縣坊及江東津亭成梁除道九年多惠政後坐事謫民咸惜之

廣西通志

王祿新城人以舉人知平和縣縣新設祿創建學校置

學田設壇壝義塚修鋪舍養濟院庶事畢舉以議大禮

及請立皇儲忤時議歸子材進士厯官南司業

福建通志

何源喬新五世孫嘉靖進士令嘉興愛民如子時有郭

杰之獄誣服者十年源覆按廉知殺人者郭明也釋杰

而罪明一邑稱神君值水災申請緩徵銀六千兩米三

千餘石查五年銀米之餘者補之萬厯初爲刑部右侍

郎有清節

明史何喬新傳
浙江通志

陶秀南城人嘉靖舉人爲太平令先是里役不均田多

脫漏秀編造黃籍爲十甲均田之法賦役悉清瀕海故

多軍衛莊田弗屬編管秀立爲軍圖令復役一視齊民

又墊墊道路起皇華息肩二亭治義冢民甚德之

浙江通志

蕭原吉字文振南城人初由鄉舉授教職以薦召入即
上章論劾權貴當路忌而軋之遂歸後尙書李時復薦
之辭不就

人物志

王華字廷光南城人進士歷浙江甯紹諸郡鋤梗扶弱
興學育材井井有序相傳華沒之所廳事前有樟樹大
可數十圍一夕夢有章生來謁指與同往華叱之而覺
明日樹忽蹶聲震城市力疾出視遂卒

府志

陳本字子深南城人由舉人官至御史以忤魏璫歸直
聲聞於天下起雲南按察司僉事聞母訃歸以不勝喪
卒子允衡別有傳

人物志

劉文卿字倭如廣昌人解元進士初爲金華司理居常
澣衣糲食簡嘖笑居郡齋朗誦一編不休擢吏部主事

所推薦多剛直恬澹之士時新建相有所託持不聽尋
改刑部自勾調南兵部以歸未幾卒年三十三

劉曰帝直洲墓志

張櫟新城人嘉靖進士居臺中敢言方鄒應龍劾嚴世蕃
櫟巡鹽河東請召還王宗茂趙錦等帝大怒逮杖六十
斥爲民穆宗初復官屢疏抗中官嘗劾大學士高拱
拱復入閣櫟已遷太僕少卿坐不謹罷歸萬厯中累官

工部右侍郎

明史鄒應龍傳

張恩字元錫尙書昇長子由進士以兵部郎課最擢廣
東參政分守嶺東時惠有巨惡民苦之號十虎三彪恩
悉處以法官至浙江左布政使

人物志

鄧澄字來沙新城人篤行孝友淹博古今由進士改庶

吉士出補監察御史風采凜然歸家數十餘年惟閉戶讀書著有大隱堂集德隅集年九十餘終

人物志

鄭嶸字天廷南城人由鄉舉任高州節推檄清虛糧賦役悉平拓城建學作新士類尋遷眉州知州卽告休

崇

集堂

吳衍字子繁南城人由進士通判常州時海倭猖沸判主兵餉餽給不乏累遷刑部郎值讞嚴世蕃藍道行獄疑言塞耳人以後患爲慮衍獨以身任其責獄上得俞讞囚山右有邊帥以失機論死援大璫爲言衍曰國法也敢假以媚人哉乞歸歷十餘年卒

人物志

王材字子難新城人嘉靖進士由檢討升南司業作太學志又取同邑儒先詩文類編黎川文緒人係小傳附

論斷於後府志

羅汝芳字維德南城人嘉靖進士除太湖知縣召諸生
論學公事多決於講座遷刑部主事厯甯國知府民兄
弟爭產訟汝芳對之泣民亦泣訟乃已初開元會罪囚
亦令聽講父艱服闕起補東昌移雲南副使進參政坐
事爲言官論罷初汝芳從永新顏鈞講學後鈞繫南京
獄當死汝芳供養獄中鬻產救之得減戍汝芳旣罷官
鈞亦赦歸汝芳事之飲食必躬進人以爲難鈞詭怪猖
狂其學歸釋事故汝芳之學亦近釋明史王畿傳白
近溪其學本於顏山農鈞與王龍溪並主講
席龍溪筆勝舌近溪舌勝筆一時稱二溪
鄧元錫字汝極南城人嘉靖鄉舉從鄒守益劉邦采劉
陽諸宿儒論學不復會試杜門著述踰三十年五經皆

有成書學者稱潛谷先生范涑爲南昌知府入覲薦元錫及劉元卿章潢於朝南京祭酒趙用賢亦請徵聘如吳與弼陳獻章故事得旨有司起送部試元錫固辭御史王道顯復以元錫元卿並薦且請無拘部試巡按秦大夔薦之詔以翰林待詔徵有司敦遣上道甫離家而卒鄉人私謚文統元錫之學淵源王守仁不盡宗其說生平博極羣書而要歸於六經所著有五經繹函史上下編皇明書並行於世明史 謹案新城縣志元錫學錫爲陳一泉墓志並詆頌羅祭羅文亦自曰異其所異稿中與羅書不稱師明史儒林傳謂元錫游羅門誤李經綸字大經南豐人夙負醇德持躬斷斷以世教爲己任爲諸生隱而著書崇禎中學使侯峒曾序其書謂列之諸子無其奧而頗有其辯視唐宋立言家無其備

而悉補其遺卓然近代一儒兼何椒邱羅明德鄧潛谷之長遂檄祀鄉賢所著有大學稽中傳禮經類編詩經教考聖功纂要範數觀通太極拾遺形釋新言十餘種

侯嗣曾李
大經集序

張壽朋字冲齋南城人萬厯進士除刑部主事謫泰安州同知終廬州府判爲人有高致不耐吏事足迹徧天下以訪友授徒爲樂所著有深息窩集

人物志
府志

張以化字龍盱南城人萬厯甲午解元其領解文張鼐嘗私習之及癸丑成進士乃出鼐之門互讓師弟子時

爲嘉話

府志

左宗郢字心源南城人萬厯進士出御史升太常少卿以所藏書三百七十種送府學尊經閣自爲記

人物志

涂國鼎字倬如新城人萬厯進士由行人擢吏部以清
通著厯升刑部侍郎大獄多平反僉都御史易應昌以
直諫忤旨力爲申救得減等進南京吏部尙書主計典
凡所激揚眾皆服之居官日少養親日多乞歸者凡三
卒於家

人物志

張紹謙字道益南城人拔貢任甯海知縣興利除害見
義必爲清糧畝定馬政甦驛遞著爲良規又捐貲刻方
正學集以勸忠義崇祀名宦升武昌同知卒著有六如

堂集

府志

鄧漢字遠遊新城人萬厯進士由內黃知縣擢河南道
御史累升巡撫順天薊昌肩背神京於邊最稱劇魏忠
賢以其私人屬之漢訊論參降不少貸連疏星變地震

水災皆峻切指斥會御史林汝翥巡城被閹家人拳擊
漢代疏有甯死金階不死奴婢等語忠賢益怒織入楊
左十五人中逮訊遠戍戊辰召還卒所著有芙蓉樓大
旭山房集薊門奏牘澠水集廣農書行於世人物志舊案
孫承宗所稱三十
五忠鄧其一也

趙師聖字我白南豐人由進士選庶吉士丙戌分校會

闈所取知名士多位至九列者著有漱芳樓集人物志

鄭之文字應尼南城人萬厯進士授南工部主事厯郎
中出知眞定府爲人高簡清峻與曹學佺友善著有遠

山堂錦研齋集明詩小序
府志

王一言字民法南城人由進士令太湖調吳江邑賦甲
天下當役者多破家奸民每詭匿紳戶一言大扁曰下

民火耗易剋吾心天理難欺遷刑部郎疏爭三王並封國本由此定遷杭嚴副使有猾吏醉商探其重貲去而脫禍於駭稚子自誣服一言察其冤立釋之官至應天府丞

人物志

黃文煒字德華南城人發解聯第年甚少授上海令除弊折奸宿猾昨舌當水旱倭寇之後建倉儲穀捐俸市米又請折草以恤荒區置義田以蘇糧役讞詞多爲人所傳

人物志

周朝瑞字思永南城人萬曆進士爲科臣泰昌初以愼初三要諫忤旨降級時補官甫四日天啟初復故官首疏參沈淮爲邪黨後同楊左諸公以忤璫備受慘酷斃獄中崇禎中追贈太僕寺卿福王時進謚忠毅著有兩

朝奏議

人物志 白志舊案周朝瑞以臨清籍發解本貫江西南城白志據府志人物志編入

鄧鍊字文純南城人萬厯進士初入臺冢宰方因權璫進將司大計劾罷之出按三吳閩越白故督王忬冤還朝諫停磁造皆報可由司理御史至廷尉司風紀幾二十年執法如山權力不能奪官至太僕卿

人物志

劉伸字宏宇廣昌人萬厯進士知歙縣地不產絲絹例徵船料抵輸商民大困伸歲卻稅契羨錢數千緡代輸奸民豪貴爲地方患按治之無少徇風采大振擢工部典試中州稱得士尋爲其地參政累官湖廣左布政使伸以寒素起家後官方面清操如一子大年別有傳

志

陳所志字邁庵廣昌人萬厯進士擢刑科給事疏言沈一貫貪險孫如游入相非由枚卜熊廷弼功在封疆舉

朝憚服以終養乞歸卒

謝志

黃勝朝殉節諸臣錄一作王孫茂字雲來廣昌人天啟進士初令江

山調邵陽以忤宗藩左遷旋升工部主事晉郎中出備

兵登萊改監軍道尋使朝鮮卻餽遺數萬金皮島總兵

沈世魁有姪志祥謀變

謝志作魯帥謀變今據勝朝殉節諸臣錄改

孫茂密

疏於朝被執遇害事聞贈太常寺卿子作牧孝友無閒

言以歲貢授分宜訓導

國朝賜孫茂諡節愍

白志勝朝殉節諸臣錄

魯論字孔壁新城人天啟選貢授潁州同知時方寇警

論繕城池治器械練鄉勇民賴以安署天長霍邱二縣

升福建藩幕未幾世變隱居卒年八十有五所著有四

書通義周易卦義問見錄詩古文十餘卷弟訓字述之

聚順一堂母馮氏早寡兄弟二人委曲養志諸子皆以

文行世其家云

白志

蕭漢字雲濤南豐進士知鍾祥縣闖賊犯郢漢以忠義誓眾鎮兵守外城者皆秦人與賊通城遂陷見執賊知其廉欲降之乃置吉祥寺僧舍奪僧剃刀自刎賊遣祭之斂以錦繡賊去門人歎曰吾師義不受污肯以賊衣斂乎悉易以常服事聞贈大理寺丞

國朝賜諡忠烈

勝朝殉節諸臣錄

張紹登字振夫南城人崇禎舉人知應城縣賊來犯偕訓導張國勛悉力禦之賊去邑侍郎王城之子權結怨族黨怨家潛導賊復來攻國勛佐紹登力守會賊射書索權權懼斬北關以出賊乘閒登南城紹登還署端坐

堂上賊至奮拳擊之被殺賊渠歎其忠以冠帶覆屍埋

堂側

明史

鄧思銘字建侯南城諸生聞闕賊陷京師憤甚集其儕數十人爲庠兵習射學技擊思自效請於有司有司笑曰庠可兵邪眾遂懈思銘鬱鬱不得志及建昌城破死之

國朝祀忠義祠

明史王養正傳
勝朝殉節諸臣錄
白志

饒陞字雲將南豐人工古文辭熟十三經註疏與同邑趙師賓友善皆以博學稱先正李經綸爲理學名儒所著撰久祕弗彰陞請於督學侯峒曾序而梓之

縣志

劉大年廣昌人崇禎進士耿介不苟以古道自任投兵部主事奉使南京還朝過濟南值城失守抗節死贈光

祿寺少卿賜祭葬

明史張秉文傳
安志

黃端伯字元公新城人崇禎進士歷甯波杭州推官福王立授禮部主事乙酉五月南京破被執死之初端伯舉甲子鄉試出同考官吳麟徵之門後端伯分校南闈得楊廷樞爲解首師弟三人後先皆死節所著有瑤光閣集

國朝賜諡烈愍

孔毓瓊曉窗集
勝朝殉節諸臣錄

黃中澹字元常廣昌人選貢授潮州通判擢荊州同知改潮州以廉能薦內召值海寇熾粵紳合疏乞復中澹知潮許之至則牒其魁單騎往諭寇數萬解散去中澹三仕潮陽廉靜愛民民戴之如一日

安志

涂伯昌新城人官監察御史與知縣李翔守新城死之

國朝賜諡節愍

勝朝殉節諸臣錄
王養正傳作徐伯昌刊誤也

謹案明史

涂世名字仲嘉伯昌從子新城人偉幹修髯好慷慨言
古今事天啟丁卯舉人知龍谿縣漳州破死之子常吉
僕黃薛黃揚王亨蔣山四人皆同日從死知府祝登元
哀之捐金歸其柩

國朝賜諡節愍

魏叔子集
勝朝殉節諸臣錄

鄒日章字美中南豐人崇禎中貢授當塗丞時烽煙四
起人多畏避日章運餉數千里外以賢勞爲直指所褒
旋致仕家居孝友有陰德子舉庚午鄉薦

白志

湯紹中字恪素南豐人崇禎進士授行人司未任平生
篤孝友優游林壑自號長潛山人長子來賀每之官誠
曰爾惟冰檠自持以養吾志而已年八十有六卒

安志

李紹先字玉立廣昌人崇禎時貢授鹽亭令獄
南親知戒勿往紹先單車就道既至修戰具備守禦戒
兵盡髡其髮密約壯士入賊營曰我兵以禿來殺諸髮
者賊果卻已而悉眾來攻城陷被執罵不絕口遇害

國朝賜諡節愍

安志勝朝殉節諸臣錄

湯來賀字佐平豐人崇禎進士揚州推官太監王坤
督鹽餉道府行屬禮來賀不爲屈杜門求罷淮撫史可
法重之考選刑科改禮部主事尋升廣東海道清理各
屬獄囚嘗微服徑詣州縣圍扉審係無辜者給照卽釋
香山囚羅姓者海賊羅亞福父也以子故繫獄久來賀
顧而嘆曰罪人不孥況父乎縣令爭不當釋來賀曰吾
忍戀一官戕一命乎竟釋之未幾亞福感釋父恩願領

眾投誠來賀用爲巡海嚮導卒收其力在粵晉總制加
兵部尙書不就歸爲遺民四十餘年當事聘入廬山主
鹿洞書院年八十二卒學者稱惕庵先生子永誠八歲
能文鼎革後隨父隱居不出卒之日遺命以白衣冠殮
永寬能文章罹禍卒滄州弟來賁讀書砥行以孝友稱
來賀有蚤我十年生願待爲師傅之語晚膺貢選教職
不就號拙逸老人

白志
府志

徐芳字仲光南城人崇禎進士授澤州知州上治行第
一以母喪歸唐王時起驗封司擢文選郎首薦揭重熙
傅振鐸傅鼎銓於朝或有劾重熙者芳言於吏部尙書
曾櫻雪其誣復薦重熙撫江櫻亦具如其言御史汪觀
請用劉中藻朱從議李遠三人同撫浙櫻持不可觀因

論櫻誤國芳言櫻秉國鈞重臣要地故宜參與浙西方
困多設一官卽增一累三人未見其可不聽林友蘭按
江西遁還閩懼劾上章詆曾櫻楊廷麟萬元吉等芳言
友蘭奸邪黨比誣陷正人降友蘭光祿錄事由是奸人
切齒謂芳與湯來賀等爲江西黨改芳翰林編修留延
津芳遂以病乞歸與友人鄧廷彬入山偕隱有高節閒
操技出游以資衣食著述甚繁縣令苗蕃選刻其十之

一曰懸榻編

謝志府志

何三省字觀我廣昌人崇禎進士累官郎中督學廣東
號得人以疾歸里國變後入山憂憤成疾卒

白志府志

江西通志卷一百五十五